

# Kàddu yu Xelu

## *Li tax téere bi jóg*

<sup>1</sup> Kàddu yu xelu yu Suleymaan buurub Israyil,  
di doomu Daawuda.

<sup>2</sup> Li ko taxa jóg di nit ñi am xel mu rafet, am  
ab yar, ngir xam wax ju lal dég-dég, <sup>3</sup> ngir yaru  
ci jéfe xel ak njub ak yoon, di jubal, <sup>4</sup> ndax ab  
téxét di foog, ndaw li it xam tey xalaat. <sup>5</sup> Na  
boroom xel mu rafet déglu, yokk dég-dégam, te  
kiy ràññee di jariñoo ay tegtal, <sup>6</sup> ngir mana xam  
aw léeb aku taas ak kàddug boroomi xel yu rafet  
ak seeni cax.

<sup>7</sup> Ragal Aji Sax ji di njàlbéenu xam-xam,  
te xel mu rafet akub yar, dof yaa ko xeeb.

## **Déglul, waajur àrtu la**

(Saar 1.8—7.27)

<sup>8</sup> Doom, toppal yaru baay,  
te bul wacc ndigalu yaay.

<sup>9</sup> Kaala gu jekk la ci bopp,  
di gànjar ci baat.

<sup>10</sup> Doom, bàkkaarkat bu la xiirtal, lànkal.

<sup>11</sup> Dañu la naan: «Dikkal, nu tèruji bakkan,  
yeeruji jaambur bu deful dara.

<sup>12</sup> Nanu mel ni njaniiw, mëdd kuy dund,  
mu jekki tàbbi biir bàmmeel.

<sup>13</sup> Mboolem alal ju réy, nu jagoo,  
yeb sunu biir kér, mu fees.

<sup>14</sup> Dikkal nu far,  
mbuuš miy benn, nu bokk.»

<sup>15</sup> Doom, bul ànd ak ñoom ciw yoon,  
bul jaare fa ñuy jaar,

<sup>16</sup> ngir dañuy xélu, nar musiba,  
di gaawtuy sàṅk bakkan.

<sup>17</sup> Doo firib caax,  
ba jàpp njanaaw luy xoole.

<sup>18</sup> Ñii kat seen bopp lañuy fir,  
seen bakknu bopp lañu sàṅk.

<sup>19</sup> Képp kuy lekk lu lewul, nii lay mujje:  
wutin wu lewul jël bakknu boroom.

### *Xel mu Rafet woote na*

<sup>20</sup> Xel mu Rafet a ngay woote ca mbedd ma,  
di xaacu ca pénc ma.

<sup>21</sup> Ma ngay wootee bérab yu gëna xumb,  
di dégtaley kàddoom, bunt dëkk ba.

<sup>22</sup> Ma nga naan: «Moo téxét bi, foo àppal sa téxét  
gi?

Ñaawlekat bi, foo àppal sa ñaawle bi?  
Dof bi, ñaata yoon ngay bañ xam-xam?

<sup>23</sup> Soo dëppee ba déglu, ma àrtu la.  
Ma ne, kon ma xellil la samam xel,  
xamal la samay kàddu.

<sup>24</sup> Damaa woote, nga gàntal,  
ma tällal loxo, faaleesu ma.

<sup>25</sup> Sofental nga samay digle,  
nanguwoo samay àrtu.

<sup>26</sup> Kon boo sëngéemee, man it ma ree,  
njàqare dab la, may textexi.

<sup>27</sup> Njàqare di ngélén, dab la,

sa musiba def callweer, buub la,  
njekkar ak fitna dal la.

<sup>28</sup> Keroog nga woo ma wall, duma wuyu,  
nga seet ma, seet, doo ma gis.

<sup>29</sup> Daa fekk nga baña xam,  
te ragal Yàlla du loo taamu.

<sup>30</sup> Dégluwoo samay digle it,  
xanaa xeeb samay àrtu yépp.

<sup>31</sup> Waaye loo ci góobe, gar ko,  
say pexe suur la këll.

<sup>32</sup> Déggadi sànk ab téxét,  
naagu rey ab dof.

<sup>33</sup> Waaye déggal ma, dëkke jàmm,  
tàggook njekkar ak safaan.»

## 2

### *Muus, mucc*

<sup>1</sup> Sama doom, déggal samay wax,  
fonk samay santaane.

<sup>2</sup> Teewlul xel mu rafet,  
sam xel di dégg.

<sup>3</sup> Ngalla wutala dégg,  
wool dég-dég wall.

<sup>4</sup> Sàkkul xel mu rafet ni xaalis,  
wut ko ni alal ju làqu.

<sup>5</sup> Kon nga xam luy ragal Aji Sax ji,  
xam Yàllaa di kan;

<sup>6</sup> ndax Aji Sax jeey maye xel mu rafet,  
kàddoom di taxa xam, di dégg.

<sup>7</sup> Day dencalal ndam kiy jubal,  
di yiir ku mat.

<sup>8</sup> Day wattu ku jub fu mu jaare,

di sàmm wóllëreem ciw yoon.

<sup>9</sup> Kon nga xam njub ak yoon,

xam jubal ak mboolem yoonu mbaax.

<sup>10</sup> Ndax xel mu rafet miy tàbbi sa xol,  
nga xam, sa xol tooy,

<sup>11</sup> nga foog, fegu,

am ug dégg, raw,

<sup>12</sup> mucc ci yoonu ku bon  
ak kuy wax lu jekkadi,

<sup>13</sup> mucc ci kuy wacc yoonu njub,  
di jaare mbedd yu lëndëm.

<sup>14</sup> Kon nga mucc ci kuy def lu bon,  
tey bànnexoo lu jekkadi.

<sup>15</sup> Yoonu ku ni mel day lunk,  
jaaruwaayam dëng.

<sup>16</sup> Xel mu rafet da lay musal ci ndaw su yemadi,  
bokk feneen, di wax lu neex.

<sup>17</sup> Day dëddu wóllëreem, ba muy ndaw,  
fätte kóllëreem ak Yàllaam.

<sup>18</sup> Kéram day joy wuti ndee,  
ay jaaruwaayam jëm njaniiw.

<sup>19</sup> Ku dem ca moom dootoo délsi,  
doo gisati yoonu dund mukk.

<sup>20</sup> Kon nag aweel mbeddum waa ju baax,  
toppal yoonu ku jub,

<sup>21</sup> ndax kuy jubal ay dëkke réew mi,  
te ku mat a fiy des.

<sup>22</sup> Ku bon, ñu dagge ci réew mi;  
kuy fecci worma, ñu buddi, sànni.

## 3

*Wóolul Yàlla*

<sup>1</sup> Doom, bul fàtte sama njàngle,  
defal sa xel ci saay santaane,

<sup>2</sup> ngir fan wi gudd lool,  
nga gëna am jàmm.

<sup>3</sup> Bu la ngor ak worma dëddu,  
booleel takk ci sa baat,  
bind ko ci sa àlluway xol.

<sup>4</sup> Kon nga xam lu jaadu,  
neex Yàllaak doom aadama.

<sup>5</sup> Nanga wóoloo Aji Sax ji, sa léppi xol,  
te bul wéeru ci saw déggin.

<sup>6</sup> Loo mèbét, bàyyil Yàlla xel,  
mu xàllal la yoon.

<sup>7</sup> Bul doyloo sa xel mu rafet,  
ragalal Aji Sax ji, dëddu mbon;

<sup>8</sup> sa yaram wér,  
say cér naat.

<sup>9</sup> Teralal Aji Sax ji ci sa alal  
ak loo jékka meññe,

<sup>10</sup> say sàq day fees, ne xéew,  
say mbàndi ndoxi reseñ di wal.

<sup>11</sup> Doom, bul xeeb yaru Aji Sax ji,  
bul bañ mu waññi la,

<sup>12</sup> ndax Aji Sax ji, ku mu sopp, waññi la,  
ni baay, ak doom ju ko neex.

*Li xel mu rafet di jariñ*

<sup>13</sup> Mbégtee ñeel ku daj xel mu rafet  
ak ku am ug dégg.

- <sup>14</sup> Am koo gën am xaalis,  
te njariñ laa raw wurus.
- <sup>15</sup> Xel mu rafet a gën gànjär;  
loo mana bëgg moo ko raw.
- <sup>16</sup> Gudd fan, mu joxee ndijoor;  
càmmoñ ba, alal ak teraanga.
- <sup>17</sup> Fa muy jaare yiw la,  
fu mu awe jàmm la.
- <sup>18</sup> Mooy garabu gudd fan ci ku ko jàpp,  
di mbégtay ku ca ñoy.
- <sup>19</sup> Aji Sax ji xel mu rafet la sose suuf,  
lale asamaan ag dégg.
- <sup>20</sup> Ci xam-xamam la ndoxi xóote ya ne jàyy,  
ay niir di lay.

*Rafet xel barke la*

- <sup>21</sup> Sama doom, saxool xelu akug foog,  
dee ci xool foo tollu.
- <sup>22</sup> Day guddal saw fan,  
di rafetal sa jikko.
- <sup>23</sup> Kon sab dox wóor,  
doo fakktalu.
- <sup>24</sup> Soo téddee doo tiit;  
say nelaw day neex.
- <sup>25</sup> Kon doo ragal njàqare lu bette  
ak saaysaay buy songe,
- <sup>26</sup> ndax Aji Sax ji da lay yiir,  
di la musal cig fir.
- <sup>27</sup> Bul xañ njekk ku ko yellowo,  
ndegam man nga ko.
- <sup>28</sup> Bul ne say dëkk: «Demal ba beneen, ma jox  
la,»  
te fekk la yor.

<sup>29</sup> Bul fexeel dëkkandoo  
bu dëkk ak yaw ci kóolute.  
<sup>30</sup> Bul joteek kenn ci neen,  
te tooñu la.

<sup>31</sup> Bul ñee ku néeg,  
te bu ko roy fenn.  
<sup>32</sup> Aji Sax ji daa sib ku dëng,  
xejjoo kuy jubal.  
<sup>33</sup> Aji Sax ji day alag kér ku bon,  
di barkeel waa kér ku jub.  
<sup>34</sup> Kuy ñaawle, moo lay ñaawal,  
ku toroxlu, mu may law yiw.  
<sup>35</sup> Teraanga di céru ku rafet xel,  
ab dof gàccoo gàcce.

## 4

### *Ku dégg ndigal, jariñu*

<sup>1</sup> Gone yi, tee ngeena dégg yaru baay,  
te déglu, ba am ug dégg?  
<sup>2</sup> Maa ngi leen di jängal lu baax,  
buleen fàtte sama njàngle.  
<sup>3</sup> Man it amoon naa baay,  
di benn bàjjo ci saa ndey.  
<sup>4</sup> Baay digal ma, ne ma:  
«Jàppal samay wax ci sam xel,  
di jéfe samay santaane, ba dund.  
<sup>5</sup> Amal xel mu rafet akug dégg.  
Bul fàtte te bul moy samay wax.  
<sup>6</sup> Bul dëddu xel mu rafet, da lay aar;  
sopp ko, mu sàmm la.  
<sup>7</sup> Njálbéenu xel mu rafet mooy sàkku ko;

ak loo mana am, amal ug dégg.

<sup>8</sup> Nawal xel mu rafet, mu darajaal la;  
tafoo ko, mu teral la.

<sup>9</sup> Da lay takkal kaala gu jekk,  
solal la mbaxanam buur.»

*Moytul yoonu ku bon*

<sup>10</sup> Déglul, doom, te dégg saay wax,  
ndax nga gudd fan.

<sup>11</sup> Yoon wu xelu laa la teg,  
jaarloo la yoonu njub.

<sup>12</sup> Doo dox ba térëf,  
doo daw, téqtalu.

<sup>13</sup> Noyal cib yar, bul yoqi,  
sàmm ko, moo yor sa bakkan.

<sup>14</sup> Yoonu ku bon, bu ci tegu;  
fu ab soxor di jaar, bu fa dox.

<sup>15</sup> Moyul, bu fa jaare;  
mbasal te wéy!

<sup>16</sup> Ku bon du nelaw te lorewul,  
du dajjant ba kera muy téqe.

<sup>17</sup> Daa bon, def ko lekk,  
di màndee coxoram.

<sup>18</sup> Yoonu ku jub day leer,  
ba ne ràññ ni bëccëg.

<sup>19</sup> Yoonu ku bon ne këruus,  
du xam lu muy téqtaloo.

*Saxal ci lu baax*

<sup>20</sup> Doom, déglul samay kàddu,  
teewlul samay wax.

<sup>21</sup> Bu ci noppee ja jàkk,  
te jàpp ko ci sa biir xel.

<sup>22</sup> Mooy dundloo ku ci jàpp,

di wéral jëmmam jépp.  
<sup>23</sup> Sàmmala sàmm sab xol,  
 nde xalaati xol ngay jéfe.  
<sup>24</sup> Dàqal wor, mu sore la;  
 kàdduy naxe, na la dànd.  
<sup>25</sup> Xooleel, sa bët ne jàkk,  
 ngay xool sa kanam màkk.  
<sup>26</sup> Seetlul fi ngay teg tànk,  
 ba foo awe, mu wóor.  
<sup>27</sup> Bul jàdd, ndijoor mbaa càmmoñ,  
 na sa tànk moyu lu bon.

## 5

### *Moytul njaaloo*

- <sup>1</sup> Sama doom, déglul sama xel mu rafet,  
 teewlul sama déggin,  
<sup>2</sup> kon nga saxoo foog,  
 say wax tegu ci xam-xam.  
<sup>3</sup> Lu mel ni lem la ndaw su yemadi di wax,  
 làmmiñ wa ni diw gu ñu lay raay.  
<sup>4</sup> Muj ga mu wex xàtt,  
 di gaañe ni ñawkay saamar.  
<sup>5</sup> Tànk ya day bartalu wuti ndee,  
 ay jéegoom àkki njaniiw.  
<sup>6</sup> Rëddul yoonu dund,  
 daa lajj, te xamu ko.  
  
<sup>7</sup> Kon, doom, déglu ma,  
 bul wacc samay kàddu.  
<sup>8</sup> Soreel ndaw soosu,  
 bul jege bunt këram.  
<sup>9</sup> Kon nga ñàkk daraja, keneen jagoo;

ku néeg bóom la.

<sup>10</sup> Jaambur jariñoo sa doole,  
doxandéem jagoo saw ñaq.

<sup>11</sup> Ngay mujje onk,  
desey yax, jeex tàkk.

<sup>12</sup> Nga naan: «Su ma yégoon, sopp ab yar  
te baña sofental waxi àrtu.

<sup>13</sup> Lu ma tee woona dégg ku may digal,  
tey teewlu sama waxi séríñ ya?

<sup>14</sup> Tuuti ma yàqu yaxeet  
fi kanam ñépp!»

### *Yemal ci sa jabar*

<sup>15</sup> Naanal ci sa mbalkam bopp,  
ndox ma balle sa teenu bopp.

<sup>16</sup> Xanaa doo wasaare sa bëti ndox ca biti,  
mu def ay wal ca pénc ya?

<sup>17</sup> Nay sa alal, yaw donj,

ku bokk feneen bokkul.

<sup>18</sup> Yal na sa naanukaay barkeel,  
nga bànnexoo kiy sa jabar ba ngay ndaw.

<sup>19</sup> Aka sopplu te jekk!

Na lay céram doy foo tollu,  
na la xañ sago saa su ne.

<sup>20</sup> Doom, ana looy xemmeme keneen,  
bay foye céri jaambur?

<sup>21</sup> Lu waay jëf, Aji Sax ji gis,  
di xool mboolem fu mu jaare.

<sup>22</sup> Jëf ju bon day fir ka ko sàlloo,  
bàkkaaram di mbaal, jàpp ko.

<sup>23</sup> Ñàkk yar, dee;  
ndof gu réy, sànku.

**6***Bul gàddul kenn bor*

- <sup>1</sup> Doom, dangaa gàddul nit bor,  
dige feyal jaambur,  
<sup>2</sup> saw làmmiñ yeb la cim pax,  
nga keppu?  
<sup>3</sup> Yaa ngi ci sa loxoy moroom,  
kon defal nii, doom, ba rëcc:  
doxal tinuji ko,  
raamali ko.  
<sup>4</sup> Bul gëmm,  
bul nelaw!  
<sup>5</sup> Dawal ni kewél gu rëcc ub rëbb,  
ne fërr ni picc mu raw ab fiirkat.

*Bul yaafus*

- <sup>6</sup> Yaafus bee, xoolal xorondom,  
seetal ci moom, ba muus.  
<sup>7</sup> Du ku ko yilif mbaa ku koy sas,  
te jiiteesu ko.  
<sup>8</sup> Bu jotee mu denc ab dundam,  
mu jot, mu for lekkam.  
<sup>9</sup> Moo yaafus bi, foo àppal tëraay bi?  
Loo deeti xaar ci yewwu?  
<sup>10</sup> Ngay dajjant ak a for bët,  
di tegley loxook a jaaxaan.  
<sup>11</sup> Néewlee ngi lay dikkal nib sàcc,  
ñakk gànnaayul la.

*Ku dëng, nii lay mel*

- <sup>12</sup> Ku tekkeedi te bon,  
day wër di fen,  
<sup>13</sup> day piis, di wokkeb tànk,  
di waxe baaraam,

<sup>14</sup> jekkadiy xalaat, di mébét lu bon  
aka yokku ay.

<sup>15</sup> Moo tax musiba di jekki dal ko,  
mu jekki yàqu, ba wees paj.

*Aji Sax ji bañ na lii*

<sup>16</sup> Juróom benn a ngii yu Aji Sax ji bañ,  
ba ci juróom yaar yu mu seexlu:

<sup>17</sup> kuy danjñiiral,  
kuy fen,  
kuy rey nit ku deful dara,  
<sup>18</sup> kuy fexe lu bon ci xolam,  
kuy gaawtuy def lu ñaaw,  
<sup>19</sup> seede buy fen rekk,  
rawatina kuy yokku ay ci biiri bokk.

*Ku njaaloo gis ko*

<sup>20</sup> Doom, defal li la baay sant,  
te bul wacc ndigalal yaay.

<sup>21</sup> Takkal foo tollu, taf ci sa xol,  
fas ko ci sa baat.

<sup>22</sup> Booy dox mu di la jiite,  
nga tèdd, mu di la sàmm,  
nga yewwu, mu di la waxal.

<sup>23</sup> Santaane da lay niital,  
ndigal leeralal la,  
artook ub yar di yoonu dund.

<sup>24</sup> Da lay aar ci ndaw su bon  
ak jabaru jaambur ak làmmiñam wu neex.

<sup>25</sup> Bu ko xemmememe taaram,  
bumu la fir aki lamsal.

<sup>26</sup> Dogu mburu Fey nab gàncc;  
waaye jabaru jaambur, bakkanu lëmm.

<sup>27</sup> Te ku ne sawara cas, tafoo,

lakk say yére.

<sup>28</sup> Ku dox ciy xal it,  
say tànk ñor.

<sup>29</sup> Mooy ànd ak jabaru jaambur,  
ku ko def gis ko.

<sup>30</sup> Deesul sikk ku sàcc aw ñam,  
def ci biiram ndax xiif.

<sup>31</sup> Waaye bu feeñee, fey boroom juróom yaari  
yoon,

joxe alalu këram yépp.

<sup>32</sup> Njaaloo di ñàkk bopp,  
kuy sànk bakkanam a koy def.

<sup>33</sup> Mbugal ak toroxte dib añam,  
te gàcceem du deñ.

<sup>34</sup> Fiiraange day feesal xolu góor,  
te du ñéebli buy feyu.

<sup>35</sup> Du faale ndàmpaay,  
loo ko may, may, du giif.

## 7

### *Ndaw su yemadi da lay fir*

<sup>1</sup> Doom, sàmmal samay wax,  
fonk samay santaane.

<sup>2</sup> Jëfeel samay santaane, ba dund,  
jàppal samay ndigal sa fukki loxo.

<sup>3</sup> Takkal ci say waaraam,  
bind ko ci sa àlluway xol.

<sup>4</sup> Safool xel mu rafet, muy sab jigéen,  
te nga xejoo dég-dég ni sa mbokk lenqe.

<sup>5</sup> Dina la aar ci ndaw su yemadi,  
bokk feneen, di wax lu neex.

*Ndaw su yemadi woote na*

- <sup>6</sup> Damaa tollu sama palanteer,  
séentu ca xarante ya,  
<sup>7</sup> séen ca biir téxét ya,  
ku ma seetlu ca xale yu góor ya,  
muy ku ñàkk bopp.  
<sup>8</sup> Muy dem ba fa ndaw say taxaw, ca selebe yoon  
wa,  
daldi wuti kér ndaw sa.  
<sup>9</sup> Ngoonug suuf la, jant biy lang,  
muy lëndëm di gëna guddi.  
<sup>10</sup> Ndaw si jekki dajeek moom,  
sol yérey gànc, lal pexeem.  
<sup>11</sup> Daa xumb, të,  
du toog këram.  
<sup>12</sup> Ma nga ca mbedd ma, ne ca pénc ya,  
ruqoo ruq, ma ngay yeeroo.  
<sup>13</sup> Ndaw sa ne ko katam, fóon,  
ne wajj, ne ko:  
<sup>14</sup> «Tey matal naa la ma digoon Yàlla,  
yàppu bernde waa nga kér ga, saraxu cant la\*.  
<sup>15</sup> Moo ma taxa dikk dajeek yaw.  
Seet naa laa seet, ba gis la.  
<sup>16</sup> Lal naa saab lal, ba mu jekk,  
di malaan yu yànj, bawoo Misra.  
<sup>17</sup> Lal ba, ma xeeñal, mu ne bann,  
di ndàbb, cuuraay ak xas mu neex.  
<sup>18</sup> Dikkal, nu baanee baane, ba bët set,  
te bànnexu ci mbëggeel.  
<sup>19</sup> Sama jëkkér newu fa,

---

\* **7:14** 7.14 saraxu cant: ku masaana rendi gàtt bu mu def  
saraxu cant ci biir jàmm, dangay jël lenn ci yàpp wi, bokk kook  
sa njaboot, lekk. Ci lekk googa la ndaw siy woo xale bu góor bi.

daa dem yoon wu sore.

<sup>20</sup> Mbuusum xaalis la ñàbb, yóbbu,  
du ñibbsi ndare weer wi fees dell.»

<sup>21</sup> Muy mocc ak a moccaat, ba nax ko,  
di wax lu neex, ba man ko.

<sup>22</sup> Waa ja jekki, topp ko,  
mbete yëkk wu ñuy rendiji,  
mbaa dof bu ñu jéng, di ko yari.

<sup>23</sup> Mooy picc mu tàbbi cig fiir.

Du xam ne day dee,  
ba keroog fitt jam ko ci xol.

<sup>24</sup> Kon nag, doom, dégluleen ma,  
teewluleen samay wax.

<sup>25</sup> Bu leen soosu ndaw xiir ci moy,  
buleen teggi, topp ko.

<sup>26</sup> Bare na ku dee, moo ko rey,  
maneesula waññ ñi mu rey ñépp.

<sup>27</sup> Kéram yoonu njaniiw la,  
daa bartalu, tàbbi néegi ndee.

## Xel mu Rafet bàkku na

### 8

(Saar 8)

<sup>1</sup> Déggal! Soxna si, Xel mu Rafet a ngi woote,  
dég-dég di xaacu.

<sup>2</sup> Ma nga taxaw ca selebe yoon ya,  
fu gëna kawe ca yoon wa.

<sup>3</sup> Ma nga bunt dëkk ba, taxaw;  
fa nit ñay jaare lay xaacoo naan:

<sup>4</sup> «Yeen mbooloo yi laay yéene,  
doom aadama yi laay joor.

- <sup>5</sup> Téxét bi, deel foog,  
dof bi, déggal ndéey lu xelu.
- <sup>6</sup> Déglul, ma wax la lu am solo,  
dégtal la njub.
- <sup>7</sup> Dëgg laay wax,  
di bañ wax ju bon.
- <sup>8</sup> Lu ma wax njub la.  
Amul lu dëng mbaa lu jekkadi.
- <sup>9</sup> Lépp a dëggu ci ku am ug dëgg,  
te jub ci ku for xam-xam.
- <sup>10</sup> Na la samab yar gënàl xaalis,  
xam-xam dàqal la ngën-gi-wurus.
- <sup>11</sup> Ndax man, xel mu rafet, maa gën gànjar,  
loo bëgg maa ko raw.
- <sup>12</sup> «Man, Xel mu Rafet, foog di sama kér;  
xam-xam ak pexe, ma for.
- <sup>13</sup> Ragal Aji Sax ji mooy bañ lu bon.  
Réy, xeebaate, yoonu mbon,  
ak wax ju jekkadi, ma boole bañ.
- <sup>14</sup> Maa moomi digle, di maye gis-gis;  
maa am ug dëgg, di boroom doole.
- <sup>15</sup> Samay pexe la buur di jiitee,  
kilifa di ci àttee dëgg.
- <sup>16</sup> Ci samay pexe la njiit di saytoo,  
ñook kèngam yeek ñiy àtte dëgg ñépp.
- <sup>17</sup> Maa sopp ku ma sopp,  
ku ma seet tigi, gis ma.
- <sup>18</sup> Alal ak teraangaa ngi fi man,  
am-am bu sax it ak yoolu njekk.
- <sup>19</sup> Li may mayee gën wurus, wa gën,  
sama njariñ wees xaalis ba gën.

**20** Yoonu njekk laay jaare,  
di jëfe li yoon àtte rekk.

**21** Ku ma sopp, ma nàddil la,  
feesal sab denc.»

*Xel mu Rafet a mag lépp*

**22** Soxna si, Xel mu Rafet nee na:  
«Aji Sax ji jagoo na ma ca njàlbéen,  
ma jiitu ca jëfam ya woon.

**23** Bu yàgg lañu ma déj,  
ca ndoorte la, bala suuf a sosu.

**24** Ba may diikk, géej amul,  
ndox ballul bay fees, di wal-wali.

**25** Dikk naa bala tund yu mag yee sampu,  
lu jiitu tund yu ndaw yi,

**26** laata Yàllaa sàkk suuf aki àllam  
ak feppu pënd ci àddina.

**27** Ba muy taxawal asamaan, maa nga fa,  
ak ba muy rëdd fa asamaan taseek géej,

**28** ak ba muy teg niir ya fa kaw,  
ak ba muy dooleel ndoxi xóotey géej,

**29** ak ba muy sàkkal géej kemoom,  
ba du jàll fa mu wax.

Ba muy rëdd fa muy samp àddina,

**30** man, Xel mu Rafet, maa doon ku xareñ ci  
wetam,

di ko bànnexal bés bu ne,  
tey bànnexu fi kanamam.

**31** May bége wérngalu àddinaam,  
di bànnexoo doomi aadama.»

*Xel mu Rafet dénkaane na*

**32** «Kon nag, doom, dégluleen ma.  
Mbégte ñeel na ki may topp.

<sup>33</sup> Dégluleen ku leen di yar, daldi muus.

Buleen ko sàggane!

<sup>34</sup> Mbégte ñeel na ki may déglu,  
di teewlu ca sama bunt bés bu nekk,  
di ma toogaanu sama bunt kér.

<sup>35</sup> Ku ma daj, gudd fan,  
Aji Sax ji bége la.

<sup>36</sup> Ku ma moy loru,  
ku ma bañ, daa repp.»

## Ñaari berndee ngi

### 9

(Saar 9)

#### Xel mu Rafet a ngi berndeel

<sup>1</sup> Soxna si, Xel mu Rafet daa tabax këram,  
yett juróom yaari kenoom.

<sup>2</sup> Mu rendi ag juram,  
njafaan ay biiñam, xelli,  
taaj ay ndabam.

<sup>3</sup> Xel mu Rafet yónni ay janqam,  
di wootee fu kawee kawe ca dëkk ba,  
<sup>4</sup> naan: «Képp ku téxét, jàddal ba ffi!»  
Ku ñàkk bopp, mu ne ko:

<sup>5</sup> «Kaay, ma may la, nga lekk,  
xellil lay biiñ, nga naan.

<sup>6</sup> Dëddul jëfi téxét ba dund,  
di jubal ci yoonu dégg.»

#### Kuy xeloo ngi ak kuy ñaawle

<sup>7</sup> Artu kuy ñaawle, feyoo saaga rekk,  
yedd ab soxor, yooloo loraange.

<sup>8</sup> Bul yedd kuy ñaawle, da lay jéppi;

yeddal ku rafet xel, mu naw la.

<sup>9</sup> Xelalal ku xelu, mu yokku.

Xamalal ku jub, mu yokk njàngam.

<sup>10</sup> Ragal Aji Sax ji di njàlbéenu rafet xel,  
xam Aji Sell ji di am ug dégg.

<sup>11</sup> Maay Xel mu Rafet, ku ma topp gudd fan,  
dund, dundati.

<sup>12</sup> Rafet xel, jariñu,  
kuy kókkalee, wéetook sa añ.

### *Ku dofey ngi berndeel*

<sup>13</sup> Jigéen ju dof day xumb,  
reew, du xam lu xew.

<sup>14</sup> Day toog bunt kéraram,  
mbaa fu kawee kawe ca dëkk ba,

<sup>15</sup> di woo ña fay jaare  
te jubal seenu yoon.

<sup>16</sup> Ma nga naa: «Képp ku téxét, jàddal ba ffi!»  
Ku ñàkk bopp, mu ne ko:

<sup>17</sup> «Ndox mu lewul a neex,  
ñamu làqu-lekk dàqati.»

<sup>18</sup> Waaye kooka du xam ne waa njaniiw a nga fa,  
te ku wuyji, tàbbi biir bàmmeel.

## **Kàddu yu Xelu yu Suleymaan**

### **10**

*(Saar 10—24)*

<sup>1</sup> Kàddu yu xelu yu Suleymaan.

Doom rafet xel, baay ba bég;  
doom dof, ndey ja tiis.

<sup>2</sup> Alal ju lewul du jariñ;

jub, mucc ci gàtt fan.

<sup>3</sup> Aji Sax ji du seetaan ku jub, di xiif,  
waaye day xañ ab soxor la mu xemmem.

<sup>4</sup> Yaafus, walaakaana;  
farlu, woomle.

<sup>5</sup> Ku ngóob jot, nga góob, xelu nga;  
ngóob taxaw, ngay nelaw, gàcce la.

<sup>6</sup> Jub, barkeelu;  
ku soxor, wax ja làq fitna.

<sup>7</sup> Ku jub barkeel, saw tur du fey;  
ab soxor, turam seey.

<sup>8</sup> Ku rafet xel day jëfe santaane,  
ab dof waxa wax, ba loru.

<sup>9</sup> Maandu, fegu;  
dëng, weeru.

<sup>10</sup> Piiseek làq-làqal, sabab njàqare;  
ab dof waxa wax, ba loru.

<sup>11</sup> Kàdduy ku jub bëtu ndox la, day naatal;  
waaye ku soxor, wax ja làq fitna.

<sup>12</sup> Mbañeelak ayoo;  
cofeelak jéggale bépp tooñ.

<sup>13</sup> Kuy dégg, say wax rafet;

te ku ñàkk bopp, yellowo yetu gannaaw.

<sup>14</sup> Ku rafet xel day xam, ne cell;  
bu dof noppiwul, yàqule teew.

<sup>15</sup> Alal day aar boroom ni ab tata,  
ñàkk di lor baadoolo.

<sup>16</sup> Ku jub jot peyam, dunde;  
ab soxor di bàkkaare alalam.

<sup>17</sup> Yaru, gudd fan;  
sàgganey àrtu, sàngku.

<sup>18</sup> Ku la nébbal mbañeel, da lay fen;  
kuy wér di sos, ab dof la.

<sup>19</sup> Wax ju bare, moy ñàkku ca;  
ku moom sa làmmiñ, xelu nga.

<sup>20</sup> Kàddug ku jub di ngën-gi-xaalís,  
xelum coxor amul solo.

<sup>21</sup> Kàdduy ku jub jariñ na ñu bare,  
dof ñàkk na bopp, ba far dee.

<sup>22</sup> Barkeb Aji Sax jeey maye alal,  
kér-kéri taxula barele.

<sup>23</sup> Jëf ju bon la dof di foye;  
ku am dég-dég safoo lu xelu.

<sup>24</sup> Ab soxor, li mu ragal moo koy dab;  
nammeelu ku jub day sotti.

<sup>25</sup> Bu ngëlén walee, ab soxor ne mes;  
ku jub, sab reen sax ba fàww.

<sup>26</sup> Ndaw lu tayel ca ka yónnee  
daa mel ni lu forox ciy gèñ  
mbaa saxar ciy gêt.

<sup>27</sup> Ragal Aji Sax ji, gudd fan;  
soxor, gàtt fan.

<sup>28</sup> Ku jub day séentu mbégte, gis ko;  
ab soxor yaakaar, yàkki.

<sup>29</sup> Aji Sax jeeki nammeelam rawtu la ci ku mat,  
di sànkute ci kuy def lu bon.

<sup>30</sup> Ku jub deesu ko daaneel mukk,  
ku soxor du yàgg cim réew.

<sup>31</sup> Kàddug ku jub day jur xel mu rafet,  
ku wax njekkar ñu tēj sa gémmiñ.

<sup>32</sup> Ku jub day xam wax ju yiw;  
ab soxor sàlloo waxy njekkar.

## 11

<sup>1</sup> Aji Sax ji bañ na njublañ ci nattub diisaay,  
ay nattukaay na mat, muy bànnexam.

<sup>2</sup> Ku réy-réylu rus;  
woyofal ndax nga xelu.

<sup>3</sup> Kuy jubal, jiital mat.  
Njublaŋ ak wor, detteelu.

<sup>4</sup> Alal du jariñ bésu mbugal;  
jub, mucc ci gàtt fan.

<sup>5</sup> Ku mat, njekk xàllal la;  
coxor daaneel boroom.

<sup>6</sup> Jubalal, sa njekk musal la;  
ab workat day bëgge, ba far keppu.

<sup>7</sup> Ab soxor saay, yaakaaram seey,  
rawatina yaakaar ju sës ci alal.

<sup>8</sup> Ku jub mucc ci njàqare,  
ab soxor wuutu ko ca.

<sup>9</sup> Ay sos la yéefar di loree,  
waaye ku jub xam-xam la cay mucce.

<sup>10</sup> Ku jub baaxle, waa dëkkam bànnexu;  
ab saaysaay saay, mbégte dim riir.

<sup>11</sup> Barkeb ku jub teral nab dëkk,  
kàddug ku soxor tas nab dëkk.

<sup>12</sup> Waxi xeebaate ñàkk bopp la,  
ku am ag dégg day noppi.

<sup>13</sup> Kuy wér di sos dangay wuññi sutura,  
ku jara wóolu dangay am bàmmeelu biir.

<sup>14</sup> Tegtal tumurànke, am réew suux;  
dogle bare, ndam dikk.

<sup>15</sup> Bul gàddul kenn bor, di loru;  
bañ koo dige, daldi am jàmm.

<sup>16</sup> Jigéen, na yiw, ñu sagal ko;  
góor gu néeg, alal doñŋ.

<sup>17</sup> Ku baax, boppam;  
ku bon, boppam.

<sup>18</sup> Coxor feyul boroom, day naxe;  
deel def njekk, sag pey wóor.

<sup>19</sup> Saxoo njekk, dund;  
sàlloo mbon, dee rekk.

<sup>20</sup> Aji Sax ji bañ na njublaŋ,  
safoo maandute.

<sup>21</sup> Ab soxor mbugalam du jaas, wóor na;  
te ku jub, saw askan mucc.

<sup>22</sup> Taaru jongama ju xel ma gàtt,  
mooy jaaro wurus ci noppu mbaam-xuux.

<sup>23</sup> Ku jub, lu baax rekk lay sàkku;  
soxor biy yaakaar, mujje mbugal.

<sup>24</sup> Nit a ngi tabe, di yokkule;  
nit di nëŋ-nëŋi, gëna ñàkk.

<sup>25</sup> Ku yéwén, woomle;  
kuy suuxat, suuxu.

<sup>26</sup> Nit a ngi móolu kuy denc pepp, ba mu ñàkkee,  
di gérém ka koy jaay.

<sup>27</sup> Wutala wut lu baax, ñu nawloo la;  
ku sàkku lu bon, yaa koy yenu.

<sup>28</sup> Ku yaakaar sa alal sab jéll a ngi ñëw,  
ku jub day jublé ni gàncax gu naat.

<sup>29</sup> Kuy fitnaal sa waa kér doo donn dara,  
ku dof, boroom xel yilif la.

<sup>30</sup> Nit ku jub garab la, doom ya di dundal;  
ku rafet xel wut nit ñi.

<sup>31</sup> Ku jub, jot sa yool ci kaw suuf,  
moykat beek soxor bi it daw raw.

## 12

<sup>1</sup> Ku bëgga xam, bëgg ku la yedd;  
ku bañ ku la àrtu, bàyyima nga.

<sup>2</sup> Ku baax, Aji Sax ji bége la;  
kuy fexe lu bon, mu daan la.

<sup>3</sup> Ab soxor, taxawaayam du yàgg;  
ku jub garab la, reen ba ne kekk.

<sup>4</sup> Jeeg bu jàmbaare day teral jékkér ja,

jeeg buy rusloo day semmal jëkkér ja.

<sup>5</sup> Ku jub, yoon lay mélét;  
ab soxor di lal pexey wor.

<sup>6</sup> Ab soxor, waxam am tëru la, day reye;  
kàdduy kiy jubal di musle.

<sup>7</sup> Ab soxor bu daanoo, jeex na;  
ku jub, sa kér taxaw, ne këcc.

<sup>8</sup> Xel mu ñaw, jëw bu rafet;  
sam xel jekkadi, ñu xeeb la.

<sup>9</sup> Woyof mbubb, am benn surga doñj,  
moo gën réyal turki tey dee ak xiif.

<sup>10</sup> Ku jub day topptoo ag juram,  
ab soxor néeg cig juram.

<sup>11</sup> Beyal sab tool, sab dund doy;  
topp ay caaxaan ñàkk bopp la.

<sup>12</sup> Ab soxor ay xemmem alal ju lewul,  
ku jub garab la, reen baa ko meññal.

<sup>13</sup> Bàkkaaru làmmiñ dugal na boroom,  
ku jub mucc ci njàqare.

<sup>14</sup> Làmmiñ reggal na boroom;  
ñaq, jariñu.

<sup>15</sup> Na dof di jëfe, njub la ci moom;

dégg ndigal rafet um xel la.

<sup>16</sup> Ab dof bu meree, mu gaawa feeñ;  
ku teey, tanqamlu saaga.

<sup>17</sup> Ku dëgggu, seede dëgg;  
seede bu bon, fen rekk.

<sup>18</sup> Làmmiñu waxkat, jam-jami jaasi;  
kàddu gu xelu, garab la ci.

<sup>19</sup> Kàdduy dëgg, day sax dàkk;  
fen, xef xippi, mu wéy.

<sup>20</sup> Kuy ràbb lu bon lal pexey wor,  
kuy digle jàmm, am mbégte.

<sup>21</sup> Ku jub du amu ay,  
ab soxor du tàggook musiba.

<sup>22</sup> Aji Sax ji sib na fen-kat,  
safoo ku dëgggu.

<sup>23</sup> Nit ku ñaw day xam, ba ca;  
ab dof siiwal waxi dofam.

<sup>24</sup> Njaxlaf, jiitu;  
yaafus, des gannaaw.

<sup>25</sup> Njàqare day jeexal xolu boroom,  
wax ju neex di tooyal xolam.

<sup>26</sup> Ku jub day seetlu ku muy xaritool\*;  
soxor bi, jikkoom a koy sànk.

<sup>27</sup> Ab yaafus bu rëbbée, sooy;  
cawarte koom la.

<sup>28</sup> Jaaral ci njekk, ba gudd fan;  
yoon wu baax deesu fa dee.

## 13

<sup>1</sup> Doom ju xelu dégg yaru baay,  
kuy ñaawle faalewuli àrtu.

<sup>2</sup> Wax ju rafet yool na boroom,  
workat fitna la namm.

<sup>3</sup> Moom sa làmmiñ, sàmm sa bakkan;  
rattaxle, yàqule.

<sup>4</sup> Ab yaafus day yaakaar, du am;  
ab njaxlaf sàkku, woomle.

<sup>5</sup> Ku jub bañ na ay fen,  
ku soxor di indi gàcceek yeraange.

<sup>6</sup> Ku mat day jub, ba fegu;  
moykat soxor, ba sànku.

<sup>7</sup> Nit a ngi am-amlu, amul dara;  
nit di dee-deelu te fees dell.

---

\* **12:26** 12.26 Mbaa: Ku jub day teg moroomam ciw yoon.

<sup>8</sup> Ku am ay fey alal, ba mucc;  
ku amul deesu ko tëkku.

<sup>9</sup> Ku jub day leer nàññ,  
ab soxor mel ni taal bu fey.

<sup>10</sup> Réy-réylu jote rekk lay jur,  
ku dégg ndigal a xelu.

<sup>11</sup> Alal ju lewul day naaw;  
foral benn-benn, ba biibal.

<sup>12</sup> Yaakaar ju tas day jeexal xol,  
aajo ju faju di suuxat bakkan.

<sup>13</sup> Ku sofental ndigalu Yàlla, yàqule;  
ku jëfe santaane Yàlla, yoolu.

<sup>14</sup> Njàngle mu xelu day suuxat bakkan,  
ba boroom du tàbbi ci fiiri ndee.

<sup>15</sup> Dangay xam lu jaadu, ñu naw la;  
yoonu workat day metti.

<sup>16</sup> Képp ku teey jëfe xam-xam;  
ab dof ay siiwal ndofam.

<sup>17</sup> Ndaw lu bon day loru.  
Ndaw lu wóor garab la ci nit.

<sup>18</sup> Ku sàggane yoonu yar, séddoo ñàkk ak gàcce;  
kuy déggi àrtu, am teraanga.

**19** Aajo ju faju tooyal na xol,  
te ab dof jomb naa dëddu mbon.

**20** Àndal ak ku xelu, sam xel rafet;  
ku lëngook ub dof, loru.

**21** Ay topp na moykat,  
ku jub juble.

**22** Ku baax, donale ba cay sëtam;  
alalu moykat, muuru ku jub.

**23** Ku néewle bey na, meññeef ne gàññ,  
ñu àtte ko ñàkkal, mu ñàkk ko.

**24** Ku dul bantal sa doom, bëggoo ko.  
Ku bëgg sa doom teel koo yar.

**25** Ku jub day lekk ba regg,  
soxor ba dëkke xiif.

## 14

**1** Jigéen, rafet xel, dimbali waa këram,  
su deeb dof, tas këram.

**2** Kuy jubal day ragal Aji Sax ji,  
ku dëng teddadil nga ko.

**3** Ab dof a ngi réy-réylu, làmmiñam yar ko;  
ku rafet xel, sa kàddu aar la.

**4** Su yëkk takkul, bey, sàq wéet;

mu beye dooleem, meññeef ne gàññ.

<sup>5</sup> Seede bu dëggú, dëgg rekk,  
seede bu dëgguwul, fen rekk.

<sup>6</sup> Ab ñaawlekat day wut xel mu rafet, mu réer  
ko;  
ku am ug dégg, xam yomb la.

<sup>7</sup> Dàndal ab dof,  
du la yokk xam-xam.

<sup>8</sup> Ku ñaw day xelu, xam li muy def;  
ab dof di nax boppam.

<sup>9</sup> Ab dof, su bàkkaaree, yoonam!  
Te ñay jubal a séq yiwu Yàlla.

<sup>10</sup> Tiisu xol, boroom a ko xam;  
mbégte ma it jaambur bokku ca.

<sup>11</sup> Ab soxor, këram day tas,  
mbaarum ku jub di naat.

<sup>12</sup> Yoon a ngii, nit defe ne jub na,  
te mu jëme ko ci dee.

<sup>13</sup> Nit a ngi ree, xol ba tiis,  
te mbégte mujje na njàqare.

<sup>14</sup> Ku def njekkar sab añ mat,  
ku baax gën law demin.

**15** Ab téxét, loo wax mu gëm;  
ku ñaw xam fi ngay jaare.

**16** Ku xelu day ragal, di dëddu lu bon;  
ab dof day ràkkaaju, du tiit.

**17** Ku gaawa mer, def jëfi dof,  
te kuy fexeel nit, ñu bañ la.

**18** Ab téxét ndof ay céram,  
ku ñaw jagoo xam-xam.

**19** Ku bon, ku baax sut la;  
ku soxor ay toogaanu ku jub.

**20** Ku ñàkk, say dëkk sax bañ la;  
ku barele, barey xarit.

**21** Ku xeeb sa dëkkandoo, bàkkaar nga;  
ku baaxe ku ñàkk, mbégte ñeel la.

**22** Kuy móbét lu bon daa réer,  
kuy móbét lu baax am nga ngor ak worma.

**23** Kér-kéri, jariñu;  
waxi neen, loxoy neen.

**24** Ku rafet xel jagoo alal,  
ab dof ràngoo ndofam.

**25** Seede bu dëggú day jot bakkan,  
kuy fen day wore.

<sup>26</sup> Ragal Aji Sax ji kaaraange gu wér la ci nit,  
di rawtu ciy doomam.

<sup>27</sup> Ragal Aji Sax ji day suuxat bakkan,  
ba boroom du tàbbi ci fiiri ndee.

<sup>28</sup> Su mbooloo baree, buur am ndam;  
fu nit ña néew, kilifa du fa dara.

<sup>29</sup> Muñ mer, déggin wu yaa;  
gaawa tàng, gënatee dof.

<sup>30</sup> Xel mu dal, yaram wu naat;  
fiiraange semmal boroom.

<sup>31</sup> Ku sonal ku ñàkk, tooñ nga ka ko sàkk;  
ku baaxe ku néewle, teral nga ka ko sàkk.

<sup>32</sup> Coxor detteel boroom;  
ku jub fegoo maanduteem.

<sup>33</sup> Kuy dégg, sam xel saxoo rafet;  
ab dof sax xam na lu xelu.

<sup>34</sup> Njekk day teral aw xeet,  
moy di gácceel aw askan.

<sup>35</sup> Buur day bége jawriñ ju xelu,  
di mbugal nitu gácce.

## 15

<sup>1</sup> Tont lu neex day giifal,  
baat bu ñagas di jógal xol.

- <sup>2</sup> Ku xelu àddu, xam-xam rafet;  
ab dof di talalali.
- <sup>3</sup> Aji Sax ji moo gis lépp,  
di xool ku baax ak ku bon.
- <sup>4</sup> Wax ju neex garab la, doom ya di dundal,  
kàddu yu jekkadi di jeexal xol.
- <sup>5</sup> Ab dof day xeeb yaru baay ba,  
kuy dégg waxi àrtu, xelu nga.
- <sup>6</sup> Kér ku jub, koom gu yaa;  
ku jubadi, alalam jur fitna.
- <sup>7</sup> Ku xelu àddu, xam-xam law;  
ab dof amul xelam.
- <sup>8</sup> Saraxub ku soxor, Aji Sax ji bañ na ko;  
ñaanu kuy jubal da koy bége.
- <sup>9</sup> Jëfi ku bon, Aji Sax ji seexlu na ko;  
ku sàlloo njekk, safoo na la.
- <sup>10</sup> Mbugal tar na, ñeel ku wacc yoon;  
ku bañ waxi àrtu, dangay dee.
- <sup>11</sup> Njaniiw ak biir suuf, Aji Sax ji di gis,  
xolu doom aadama waxi noppí.
- <sup>12</sup> Kuy ñaawle buggul ku ko àrtu,  
te du laaji ku rafet xel.
- <sup>13</sup> Xol bu sedd, kanam gu leer;

xol bu tiis, boroom ne yogg.

<sup>14</sup> Ku am ug dégg sàkku xam-xam,  
ab dof di toppi caaxaan.

<sup>15</sup> Xol bu tiis, naqar wu sax;  
xol bu neex, bànnex bu sax.

<sup>16</sup> Néewle te ragal Aji Sax ji  
moo gën barele, sa bopp ubu.

<sup>17</sup> Njëlu ñetti xob fa ñu la soppe  
moo dàq yàpp wu duuf fu ñu la bañe.

<sup>18</sup> Naqari deret, taalu ay.  
Teeey, fey fitna.

<sup>19</sup> Yoonu yaafus, dégi neen;  
kuy jubal, saw xàll yaa.

<sup>20</sup> Doom rafet xel, baay ba bégi;  
te ab dof ay xeeb ndey ja.

<sup>21</sup> Jëfi dof a neex ku ñàkk bopp,  
ku am ug dégg def njub.

<sup>22</sup> Diisoo ñàkk, pexe moy;  
dingle takku, pexe joy.

<sup>23</sup> Nit bége na tontam lu dal,  
kàddu gu jib fa mu ñoree neex!

<sup>24</sup> Ku rafet xel, jubal nga yoonu gudd fan,

moyu teggi, ba jëm njaniiw.

<sup>25</sup> Ku bew, Aji Sax ji màbb sa kër;  
ab jëtun, Aji Sax ji ñoñal pàkkam.

<sup>26</sup> Aji Sax ji bañ na mébét mu bon,  
te wax ju yiw daa sell fa moom.

<sup>27</sup> Wutin wu lewul, sonal sa waa kër;  
ku bañ alalu ger gudd fan.

<sup>28</sup> Ku jub day teeylu tontam;  
ab soxor, wax ju ñaaw rekk.

<sup>29</sup> Aji Sax ji day dëddu ab soxor,  
di nangu ñaanu ku jub.

<sup>30</sup> Kanam gu leer day seral xol;  
xibaaru jàmm, jàmmu yaram.

<sup>31</sup> Kuy dégg àrtu yu koy musal,  
ku rafet xel a ngoog.

<sup>32</sup> Xalab waxi yar, foye sa bopp la;  
deel déggi àrtu, yokk sam xel.

<sup>33</sup> Ragal Aji Sax ji day rafetal xel;  
jëkke woyof, mujje tedd.

## 16

<sup>1</sup> Nit ay dogu ci xolam,  
Aji Sax ji dogal, mu sotti.

<sup>2</sup> Lu waay def, daa jekk ca moom,  
waaye Aji Sax jeey natt xol yi.

<sup>3</sup> Loo bëgga def, diis ko Aji Sax ji,  
say mébét sotti.

<sup>4</sup> Lu Aji Sax ji sàkk, mbir la ca namm,  
ba ci ku soxor ak bésu mbugalam.

<sup>5</sup> Aji Sax ji sib na ku réy,  
da koy mbugal ci lu wér.

<sup>6</sup> Ku jiital ngor ak worma, Yàlla jéggal la;  
ku ragal Aji Sax ji, dëddu lu bon.

<sup>7</sup> Ku Aji Sax ji rafetlu say jëf,  
say bañ sax, mu jubaleek yaw.

<sup>8</sup> Néewle te jub  
moo gën barele te jubadi.

<sup>9</sup> Nit ay sumb yoonam,  
Aji Sax ji sottal.

<sup>10</sup> Su buur àddoo cib àtte,  
muy kàddu gu Yàlla dogal.

<sup>11</sup> Nattub diisaay aki ndabam, na jub ngir Aji Sax  
ji.  
Moo sàkk mboolem nattukaay.

<sup>12</sup> Buur daa sib kuy def lu bon,  
ngir njekkay dëgëral nguuram.

**13** Wax ju dëggú, buur safoo boroom;  
ku jub, buur bëgg sa kàddu.

**14** Merum buur ndaw la, dee a ko yónni;  
ku rafet um xel, giifal ko.

**15** Buur, na kanam ga leer, sa bakkan mucc,  
su la baaxee, mu mel ni taw bu topp um nji.

**16** Wutal xel mu rafet, bàyyi wurus;  
taamul ag dégg, wacc xaalis.

**17** Yoonu kuy jubal day moyu lu bon,  
ku teeylu sa jëfin, sàmm sa bakkan.

**18** Réy, yàqule;  
xeebaate, jóoru.

**19** Woyof, ànd ak ku néewle  
moo gën séddook ku bew la mu lewal.

**20** Ku teewlu mbir, baaxle;  
ku wóolu Aji Sax ji, bég.

**21** Ki rafet xel mooy kiy ràññee,  
te su wax rafetee, dég-dég yomb.

**22** Xel mu ñaw day suuxat bakkan,  
te ab dof jëfi dofam a koy yar.

**23** Ku rafet xel, say kàddu xelu;  
soo waxee, yey.

<sup>24</sup> Wax ju yiw di lem juy xelli,  
neexa ñam, di jàmmi yaram.

<sup>25</sup> Yoon a ngi, nit defe ne jub na,  
te mu jëme ko ci ndee.

<sup>26</sup> Ku bëgg lu neex, liggéey;  
ku bëgga faj sab xiif, njaxlaf.

<sup>27</sup> Sagaru nit mooy sulli lu bon,  
ay waxam sax sawara la.

<sup>28</sup> Nitu njekkar day yokk réeroo,  
ab soskat di féewaley xarit.

<sup>29</sup> Ab soxor day yóbbaale dëkkandoom,  
jëme ko ci lu bon.

<sup>30</sup> Piise, ku nar njekkar;  
màttu, ku def lu bon.

<sup>31</sup> Bijjaawu bopp kaala gu yànj la,  
njekk a koy maye.

<sup>32</sup> Muñ mer, moo gën njàmbaar;  
tënk sa bakkan moo raw nangub dëkk.

<sup>33</sup> Tegoo bant nit a koy def,  
dogal ba Aji Sax ji la.

moo gën lu ne gàññ kérug ayoo.

<sup>2</sup> Surga, bu rafetee xel, tiim doom juy rusloo,  
séddu ni doom ci alalu sangam.

<sup>3</sup> Xaalis ak wurus sawaraa koy xelli,  
waaye nit, ab xolam, Aji Sax jee koy nattu.

<sup>4</sup> Ku bon ay déglu wax ju bon,  
fen-kat di teewlu ay sos.

<sup>5</sup> Kuy ñaawal ku ñakk, tooñ nga ka ko sàkk;  
kuy reetaan ku jàq, mbugalam du jaas.

<sup>6</sup> Teraangay maam, sët ba;  
sagu doom, baay ba.

<sup>7</sup> Waxi teggin jekkul cib dof,  
ay fen ci as gor waxi noppi.

<sup>8</sup> Alalu ger njiglaay la ca ka koy joxe,  
ba fu mu jublu, mu nooy.

<sup>9</sup> Bale tooñ, yokk cofeel;  
sulliw ay, tas xarit.

<sup>10</sup> Ku am ug dégg ngay yedd benn yoon,  
ab dof téeméeri yar du ko waññi.

<sup>11</sup> Ku bon fippu donj lay jéem,  
te musibaa koy dikkal.

<sup>12</sup> Taseek gaynde gu ñakkí doomam

moo gën taseek dof ak yëfi dofam.

<sup>13</sup> Kuy feye mbon jëf ju baax,  
lu bon du jóge sa kér.

<sup>14</sup> Ndoortel ay di wal mu tàmbali,  
luy indib xuloo, bàyyil.

<sup>15</sup> Dëggal ku sikk ak daan ku jub,  
Aji Sax ji sib na yooyu yaar.

<sup>16</sup> Ab dof du am xaalis, jënde xel mu rafet;  
buggu ca dara.

<sup>17</sup> Xarit du bëgg, di bañ;  
mbokk day bokk ak yaw say coono.

<sup>18</sup> Ku ñakk bopp ay dige feyal jaambur,  
di ko gàddul boram.

<sup>19</sup> Ku bëggu ay bëggi tooñ;  
damu, yàqule.

<sup>20</sup> Ku njublañ du baaxle,  
kuy wax njekkar aña musiba.

<sup>21</sup> Ku jur ab dof, am naqar;  
ab dof waajuram du béг.

<sup>22</sup> Xol bu sedd day garabal,  
xol bu tiis day semmal.

<sup>23</sup> Ku bon day nangu alalu ger ca suuf,

nara jalgati yoon.

<sup>24</sup> Ku am ug dégg ne jàkk ci xel mu rafet,  
ab dof ne xóll, xel ma sore lool.

<sup>25</sup> Doom ju dof di tiisu baay ba  
ak naqaru ndey ja.

<sup>26</sup> Ku deful dara, feyloo kob daan, dug njub;  
dóor as gor du yoon.

<sup>27</sup> Ku moom sa làmmiñ am nga xam-xam,  
te ku teey am ngag dégg.

<sup>28</sup> Ab dof sax bu noppée, nirook boroom xel;  
ku ne cell, ñu fooge lag muus.

## 18

<sup>1</sup> Ab siis, bànnexu boppam rekk,  
loo ko digal mu xalab.

<sup>2</sup> Ab dof wutul ag dégg,  
balaa caag muy jaay ag muus.

<sup>3</sup> Bu mbon nuyoo, xeebeel topp ca;  
jëf ju ñaaw, gàcce rekk.

<sup>4</sup> Waxi nit ndox mu xóot la,  
bu bënnee, xelli, ñu di ca xelu.

<sup>5</sup> Faral ku tooñ baaxul,  
bul xañ dëgg ku deful dara.

**6** Ab dof, làmmiñam sooke naw ay,  
ay waxam di sàkku yeti gannaaw.

**7** Ab dof, waxam a koy sànk,  
làmmiñu boppam a koy dugal.

**8** Waxy jëwkat di ñam wu neex  
wuy seey, jàll ca biir-a-biir.

**9** Kuy sàggane sa liggéey,  
yaak kuy yàq a bokk.

**10** Turu Aji Sax ji rawtu bu mag la.  
Ku jub daw làqu ca, raw.

**11** Alal day aar boroom ni ab tata,  
mu xalaat ne maneesu koo bëtt.

**12** Bew, yàqule;  
jëkke woyof, mujje tedd.

**13** Tontu te déggagoo,  
ndof la, ak ñàkk kersa.

**14** Ku bëgga dund, dékku woppi yaram,  
waaye xol bu jeex maneesu koo wéye.

**15** Ku am ug dégg wut xam-xam,  
ku rafet xel sàkku xam-xam.

**16** Deel maye, da lay ubbil bunt,  
di la àggle ci boroom daraja.

<sup>17</sup> Ku jëkke layoo, ñu ne yaa yey,  
ba keroog ka nga joteel weddi la.

<sup>18</sup> Tegoo bant day feyu ay,  
di àtte boroom doole yu jote.

<sup>19</sup> Jubook mbokk moo tooñ,  
jérggi tataa ko gëna yomb,  
mbaa ubbi bunt yu téje ràpp.

<sup>20</sup> Làmmiñ feesal na biiru boroom,  
yoolu kàddu suur na boroom.

<sup>21</sup> Dund ak dee a ngi ci làmmiñ,  
te wax garab la, ku ko bëgg, lekk ca doom ya.

<sup>22</sup> Ku am jabar, am nga ngëneel,  
am nga yiwu Aji Sax ji.

<sup>23</sup> Ku ñàkk a ngi leewaayu,  
boroom alal di ko jànni.

<sup>24</sup> Barey àndandoo lor a ngi ci,  
waaye xarit a ngi gëna taq nit mbokkam.

## 19

<sup>1</sup> Ñàkk te mat,  
moo gën dof, di wax njekkar.

<sup>2</sup> Teeyadi baaxul,  
ku yakkamti moy saw yoon.

<sup>3</sup> Nit def na jëfi dof, ba sàndu,  
walbatiku mere Aji Sax ji.

<sup>4</sup> Ku barele, barey xarit;  
ku ñàkk, sab xarit dagg la.

<sup>5</sup> Seede buy fen muccul mbugalam,  
kuy noyyee ay fen du rëcc àtteem.

<sup>6</sup> Nu baree ngi wuta neex boroom daraja,  
ku nekk a bëgga xaritook kuy joxe.

<sup>7</sup> Ku ñàkk, sa bokk yépp dëddu la,  
sab xarit gën laa soreeti,  
ngay wax ak ñoom, dara.

<sup>8</sup> Kuy sàkku xel, bëgg nga sa bopp;  
kuy wut ag dégg day baaxle.

<sup>9</sup> Seede buy fen muccul mbugalam,  
kuy noyyee ay fen, mujje sàndu.

<sup>10</sup> Dund gu neex jekkul cib dof,  
surga buy jiite kilifa it moo yées.

<sup>11</sup> Ku xam lu jaadu, muñ mer,  
tanqamlu ku la tooñ ngay damoo.

<sup>12</sup> Merum buur ni gaynde gu ñar;  
yërmantey buur ni lay cig mbooy.

<sup>13</sup> Doom ju dof naqaru baay baa,  
te jabar ju pànk mooy senn bu dakkul.

<sup>14</sup> Kér ak alal ngay donne ci baay;  
jabar ju xelu, Aji Sax jee koy maye.

<sup>15</sup> Ab yaafus, nelaw yu xóot,  
te ku yàccaaral xiif.

<sup>16</sup> Ku jëfe ndigal, sàmm sa bakkan;  
ku moytuwul sa bopp, dangay dee.

<sup>17</sup> Ku baaxe ku ñàkk, lebal nga Aji Sax ji,  
te moo lay yool.

<sup>18</sup> Yaral sa doom ba muy teel,  
waaye bul topp sa xol, ba rey ko.

<sup>19</sup> Ku naqari deret, sonal nga sa bopp;  
ku la xettli, tollanti ko.

<sup>20</sup> Déggal ndigal te yaru,  
ndax èllèg nga xelu.

<sup>21</sup> Bare na lu xol di mébét,  
waaye Aji Sax jeey dogal.

<sup>22</sup> Li ñu sopp ci nit mooy ngor,  
néewle moo gën fen.

<sup>23</sup> Ragalal Aji Sax ji ndax nga gudd fan,  
nopplu te baña loru.

<sup>24</sup> Ab yaafus day yeb loxoom ci ndab,  
tàyyi ko yékkati, sex.

**25** Boo ñefee ab ñaawlekat, téxét ba jànge ca;  
nga yedd kuy dégg, mu xame ca.

**26** Kuy yàqal sa baay, di dàq sa ndey,  
yaay indi gàcceek yeraange.

**27** Doom, soo noppee déglu ku lay yar,  
sore nga kàdduy xam-xam.

**28** Seedeb naaféq faalewul yoon,  
ab soxor lu bon lay tàqamtikoo.

**29** Na ñaawlekat bi séentu mbugal;  
ab dof, yeti gannaaw.

## 20

**1** Naan biiñ ak ñaawle, naan ñoll, tanqale,  
ku mu nax xeluwoo.

**2** Buur mer lool, mel ni gayndee ñar;  
boo ko merloo, dangay xaru.

**3** Moytuw ay, ndam la;  
dof boo gis day bëgg xuloo.

**4** Ab yaafus du gabb ba mu jotee,  
day wut am ngóob, du am dara.

**5** Mébétu jaambur day teen bu xóot,  
ku am ug dégg a cay root.

**6** Ņu baree ngi naa: «Gore naa,»

waaye kuy boroom kóllëre dëgg?

<sup>7</sup> Ku jub, di jëfeg mat,  
doom ju la wuutu bég na.

<sup>8</sup> Su buur toogee di àtte,  
day gis, di ràññee mboolem ayib.

<sup>9</sup> Ana ku man ne fóot na xolam,  
ba tàggook bàkkaar?

<sup>10</sup> Nattu diisaay yu yemul ak lu ni mel,  
Aji Sax ji bañ na ko.

<sup>11</sup> Gone sax day jëf, nga gis jikkoom;  
bu naree dëggu te jub, nga xam.

<sup>12</sup> Nopp buy dégg ak bët buy gis,  
Aji Sax jee sàkk lu ci nekk.

<sup>13</sup> Bul bëggi nelaw, ba ñàkk dab la;  
boo njaxlafee, lekk ba desal.

<sup>14</sup> Kuy waxaalee ngi naan: «Baaxul de!»  
Bu nee wérëñ, di damu naan: «Aka jar!»

<sup>15</sup> Wurus am na ak gànjar yu bare,  
waaye kàdduy xam-xam a gën per yu jafe.

<sup>16</sup> Ku gàddul jaambur bor, jélal mbubbam;  
tayle ko, moo dige feyal jaambur.

<sup>17</sup> Njublanj, lekk, jékke neex,

mujj mel ni lancub suuf.

<sup>18</sup> Pexe, ndigal a koy lal;  
xare, ay tegtal.

<sup>19</sup> Kuy wér di jëw, wuññi sutura;  
ku réy làmmiñ, bul déeyook moom.

<sup>20</sup> Ku saaga sa ndey mbaa sa baay  
añe lëndëmu bàmmeel.

<sup>21</sup> Alal ju gaaw  
du mujje barkeel.

<sup>22</sup> Bul feyantook ku la tooñ;  
dénkul ci Aji Sax ji, mu wallu la.

<sup>23</sup> Aji Sax ji bañ na nattu diisaay yu wuute,  
njublañ ci natti diisaay baaxul.

<sup>24</sup> Jéegoy jaam Aji Sax jee ko yor,  
kenn xamul foo jém.

<sup>25</sup> Bul gaawtuy digeek Yàlla, di dugal sa bopp;  
bul giñ, di réccu.

<sup>26</sup> Buur, bu xeloo, ràññee ku bon,  
mbugal ko, te du ko ñéebtu.

<sup>27</sup> Xelum nit làmp la bu Aji Sax ji taal,  
da koy niital ba ca biir xolam.

<sup>28</sup> Ngor ak worma day aar buur,

ngor ay saxal ab jalām.

<sup>29</sup> Sagu ndaw, doole ja;  
gànjaru mag, bijjaaw ba.

<sup>30</sup> Dóor yu la gaañ faj na sag mbon,  
ay yar fóot na xolu boroom.

## 21

<sup>1</sup> Xolu buur walum ndox la ci loxol Aji Sax ji,  
fu ko soob mu jëme ko fa.

<sup>2</sup> Lu waay def, daa jub ca moom,  
waaye Aji Sax jeey natt xol yi.

<sup>3</sup> Deel def dëgg ak njekk,  
moo gënäl Aji Sax ji ab sarax.

<sup>4</sup> Xeebaateek réy-réylu  
mooy bàkkaar yi ñuy ràññee ku bon.

<sup>5</sup> Farlu, woomle;  
ku gaawtu, mujj néewle.

<sup>6</sup> Alal ju la fen may,  
cóolóol la, day naaw, wut ko xaru la.

<sup>7</sup> Coxor day sànk boroom,  
ndax day baña def njub.

<sup>8</sup> Ab saaysaay day dëngal,  
nit ku dëggu di jubal.

<sup>9</sup> Dëkkeb ruq cim sàq  
moo gën jabar ju pànk.

<sup>10</sup> Ab soxor day namma lore,  
te du yérém moroomam.

<sup>11</sup> Boo mbugalee kuy ñaaawle, ab téxét jànge ca;  
nga jàngal ku rafet xel, mu yokku.

<sup>12</sup> Aji Jub ji Yàlla xam na la ne ca biir kér ku bon,  
te mooy sànk ku bon.

<sup>13</sup> Ku tanqamlu jooyi ku ñàkk  
dina woote wall, wall ñàkk.

<sup>14</sup> Ku mer, may ko ci sutura, mu giif;  
boroom xadar, boqal ko neexal, mu dal.

<sup>15</sup> Bu yoon amee, ku jub bég;  
kuy def lu bon jàq.

<sup>16</sup> Ku noppee jëfe xel,  
noppluji njaniiw.

<sup>17</sup> Ku topp sa bànnex, mujje ñàkk;  
ku sopp biiñ ak lu niin du woomle.

<sup>18</sup> Ku bon këppoo ayu ku baax,  
workat gàddu musibam kuy jubal.

<sup>19</sup> Dëkke ndànd-foyfoy  
moo gën jabar ju tàng, bare ay.

**20** Ku xelu denc këram ngëneeli alal aku diw,  
ab dof saax-saaxee josam.

**21** Ku saxoo njekk ak ngor  
am fan wu gudd, naataangeek daraja.

**22** Ku ñaw mana daan jàmbaari dëkk bu mag,  
ba màbb tata ja ñu yaakaaroon.

**23** Ub sa gémmiñ, moom sa làmmiñ,  
mucc ci njàqare.

**24** Ku réy te bew, mooy ñaawle,  
day reew, ba jérggi dayo.

**25** Ab yaafus day bëgg lu mu amul ba dee,  
ndax du nangoo liggeey;

**26** day yendoo xemmem, te du am,  
ka jub di joxeek a joxewaat.

**27** Saraxu nit ku bon ñaawtéef la,  
rawatina bu ci jubloo lu bon.

**28** Seede buy fen day sàngku,  
kuy dégg, sa kàddu sax.

**29** Ku bon day ñeme-ñemelu,  
ku jub la muy def da koy wóor.

**30** Nit xeluwul, amul ug dégg ak pexe,  
ba manal Aji Sax ji dara.

**31** Nit ay takk, bésub xare,

Aji Sax ji di maye ndam.

## 22

<sup>1</sup> Jëw bu rafet a gën barele,  
wegeel gën xaalis ak wurus.

<sup>2</sup> Ku am ak ku ñàkk a bokk lenn:  
Aji Sax jee leen boole sàkk.

<sup>3</sup> Kuy foog, gisu ay, làqu;  
ab téxét ne ca tëñëx, loru.

<sup>4</sup> Woyofal te ragal Aji Sax ji,  
am alal, gudd fan ak daraja.

<sup>5</sup> Yoonu njublaŋ, ay dég aki fir;  
ku sàmm sa bakkan sore ko.

<sup>6</sup> Tegal gone ciw yoon,  
ba bu màggee, du ko wacc.

<sup>7</sup> Ku am ay yilif ku ñàkk,  
koo leb di surgaam.

<sup>8</sup> Ku ji njubadi, góob fitna,  
yet wa muy dóore, damm.

<sup>9</sup> Ku tabe am barke,  
mooy kiy sédd ku ñàkk cib dundam.

<sup>10</sup> Dàqal kuy ñaawle, ay jeex,  
xulooki saaga dakk.

**11** Ku dëggu, wax ja yiw,  
buur di xaritam.

**12** Aji Sax jeey sàmm liy dëgg,  
di weddi waxi fen-kat.

**13** Bul yaafus, ba naan: «Gayndee ngi ci biti,  
dañu may rey ci mbedd mi!»

**14** Waxi ndaw su yemadi am yeer la,  
ku Aji Sax ji rëbb moo cay tàbbi.

**15** Yëfi dof daa sax ci xolu gone,  
boo bantalee, mu tàggook moom.

**16** Not néew-ji-doole ngir yokkule,  
mbaa may boroom alal,  
loo ci def mu wàññi la.

### *Fanweeri tegtal a ngi*

**17** Teewlul te déglu li boroom xel yi wax.  
Defal sam xel ci li ma lay xamal.

**18** Soo mokkalee, ba man koo tari,  
muy sa mbégte.

**19** Yaw laa koy xamal tey jii,  
ndax nga wóolu Aji Sax ji.

**20** Dama laa bindal fanweeri dénkaane,  
ci wàllu digal ak xam-xam,

**21** ngir xamal la lu wér te dëggu,  
nga yóbbale kàdduy dëgg,  
yoo tontoo ña la yebal.

### *[1]*

**22** Bul xañ néew-ji-doole; néew-ji-doole la.  
Ku tumurànke, bu ko soxore cib àtte,

<sup>23</sup> Aji Sax ji da koy taxawu,  
ku ko xañ, mu xañ la bakkan.

[2]

<sup>24</sup> Bul xaritook ku gaawa mer,  
bul ànd ak ku tàng bopp.

<sup>25</sup> Lu ko moy nga mel ni moom,  
te kon nga lonku.

[3]

<sup>26</sup> Bul bokk ci ñiy dige,  
di gàddul nit bor.

<sup>27</sup> Soo amul loo ko feyale,  
ñu yékkatee la sab lal, nangu ko.

[4]

<sup>28</sup> Bul toxal màndargam cosaan ci làccu suuf  
te say maam tefoon ko fa démb.

[5]

<sup>29</sup> Seetlul ku man liggéeyam,  
buur lay liggéeyal,  
du liggéeyal baadoolo.

## 23

[6]

<sup>1</sup> Soo bokkeek kilifa ndab,  
xamal bu baax ni ngay lekke.

<sup>2</sup> Soo dee ku bëgg lekk,  
téyeel sa loxo.

<sup>3</sup> Bul xemmem daraam lu neex,  
ñam woowu la lay naxe.

[7]

<sup>4</sup> Bul rey sa bopp ci wut alal,

bu ko xalaat sax.

<sup>5</sup> Ndax xef ak xippi mu wéy,  
mel ni lu saxi laaf,  
ne fëyy, naaw ni jaxaay.

[8]

<sup>6</sup> Ab nay, bul lekke këram,  
bul xemmem daraam lu neex.

<sup>7</sup> Ma ngay xool la ngay lekk, nu mu tollu,  
naan la: «Lekkal, naanal!»  
Te xol ba àndu ca.

<sup>8</sup> Ndog soo ca lekk, waccu ko,  
yiw woo ko wax daldi neen.

[9]

<sup>9</sup> Bul wax akub dof,  
day xeeb sam xel.

[10]

<sup>10</sup> Bul toxal mändargam cosaan ci làccu suuf,  
bul aakimoo suufas jirim.

<sup>11</sup> Ki koy aar màgg na,  
da koy taxawu, dal ci sa kaw.

[11]

<sup>12</sup> Defal sam xel ci yar,  
te teewlu kàdduy xam-xam.

[12]

<sup>13</sup> Bul ñéebloo yar gone,  
bantal ko taxu koo dee.

<sup>14</sup> Soo ko bantalee,  
mu mana mucc.

[13]

<sup>15</sup> Sama doom, soo xeloo,  
sama xol neex.

<sup>16</sup> Ngay wax njub,

ma bég.

**[14]**

- <sup>17</sup> Bul ñee bàkkaarkat,  
saxool ragal Aji Sax ji,  
<sup>18</sup> ndax kat moo am muj,  
te kon sa yaakaar du tas.

**[15]**

- <sup>19</sup> Dèglul, doom, muusal  
te yebu ci yoonu njub.  
<sup>20</sup> Bul bokk ci ñiy lekk lu ëpp,  
ak a màndi,  
<sup>21</sup> ndax ku bëgg lekk ak a màndi, ñàkk dab la,  
dajjant it, rafle rekk.

**[16]**

- <sup>22</sup> Dèglul sa baay bi la jur.  
Bu sa ndey màggatee, bu ko sàggane.  
<sup>23</sup> Jëndal dëgg te bu ko jaay.  
Sàkkul xel mu rafet ak yar akug dégg.  
<sup>24</sup> Su doom jubee, seral xolu baay.  
Boo juree ku rafet xel, am nga bànnex.  
<sup>25</sup> Deel bégal ndey ak baay,  
rawatina ndey ji la jur.

**[17]**

- <sup>26</sup> Doom, teewloo ma xel  
te roy ma.  
<sup>27</sup> Ab gànc yeer mu xóot la,  
jabaru jaambur di teen bu xat.  
<sup>28</sup> Ma ngay tëroo nib sàcc,  
góor ñu bare lay fecciloo worma.

**[18]**

- <sup>29</sup> Ana kuy tiislù, naan: «Wóoy, ngalla man!»

Ana kuy xulook a jàmbat,  
di gaañu ci dara,  
bët ya xonq curr?

<sup>30</sup> Xanaa kiy naan-naane biiñ,  
di mosi yeneen njafaan?

<sup>31</sup> Bul xool biiñ ak xonqaayam.  
Aka yànj cib kaas  
te neexa jolu!

<sup>32</sup> Bu weesee mu màtt la ni jaan,  
ne la càppit ni ñàngóor.

<sup>33</sup> Dangay mel ni kuy gis lu doy waarr,  
sam xel di ràbb lu jekkadi.

<sup>34</sup> Nga mel ni ku tèdd biir géej,  
di jaayu ca biir gaal ga,

<sup>35</sup> nga naan: «Dañu maa dóor te gaañuwuma,  
duma ma te yéguma ko.

Moo! Duma yewwu nag,  
ba naaneeti?»

## 24

### [19]

<sup>1</sup> Bul ñee ku bon,  
bul wuta ànd ak moom,  
<sup>2</sup> ndax coxor lay nas ci xolam,  
te fitna la ay waxam di yee.

### [20]

<sup>3</sup> Xel mu rafet ay tabax kér,  
rafet déggin a koy samp.  
<sup>4</sup> Xam-xam ay feesal néeg ya  
ak mboolem alal ju jafe te yànj.

### [21]

<sup>5</sup> Ku rafet xel di boroom doole,

ku xam, gëna man;  
<sup>6</sup> tegtal yu xelu lañuy xaree,  
 diisoo bu yaatooy maye ndam.

**[22]**

<sup>7</sup> Wax ju xelu sut nab dof,  
 jataayu pénc du fa àddoo.

**[23]**

<sup>8</sup> Kuy mébét lu bon,  
 ñu ne yaay rambaaaj bi.  
<sup>9</sup> Pexem dof bàkkaar la,  
 te kuy ñaawle, ñu sib la.

**[24]**

<sup>10</sup> Bu mettee, nga yoqi,  
 sa doolee néew.

**[25]**

<sup>11</sup> Wallul ku ñuy reyi te tooñul,  
 xettlil kuy térëf, ñu di ko reyi.  
<sup>12</sup> Soo nee sa yoon nekku ci it,  
 kiy natt xol yi, xam na,  
 moom miy wattu sa bakkan, xam na,  
 te kat mooy fey nit jéfam.

**[26]**

<sup>13</sup> Doom, deel lekk lem, baax na,  
 lem ju xelli, boo sexee, mu tem-temi.  
<sup>14</sup> Xamat ne xel mu rafet ni la neexe;  
 soo xeloo, sa muj rafet,  
 te sa yaakaar du tas.

**[27]**

<sup>15</sup> Soxor bi, bul têru ku jub ci këram,  
 bul yàq dëkkuwaayam.  
<sup>16</sup> Ku jub day daanu juróom yaari yoon, jógaat,

ab soxor sérëx ci njekkar.

*[28]*

<sup>17</sup> Bu sab noon daanoo, bu ko bânnexoo,  
bu têrëfee, bu ko bége.

<sup>18</sup> Lu ko moy Aji Sax ji gis la, ñaawlu ko,  
daldi giif, dootu ko mbugal.

*[29]*

<sup>19</sup> Bu sa xol tàng ci ku bon,  
bul ñee ku soxor.

<sup>20</sup> Ku bon amul muj,  
ku soxor day mel ni taal bu fey.

*[30]*

<sup>21</sup> Doom, ragalal Aji Sax ji, wormaal buur.  
Bul lëngook kuy fippu.

<sup>22</sup> Yällaak buur a koy bette mbugal,  
te kenn xamul musiba mu muy doon.

*Yeneen tegtal a ngi*

<sup>23</sup> Lii it ñi rafet xel a ko wax.

Par-parloo cib àtte baaxul.

<sup>24</sup> Ku ne defkatu lu bon: «Yaw, tooñoo,»  
aw nit móolu la, mbooloo ñàññ la;

<sup>25</sup> ku ko ne: «Yaa tooñ,» yaay baaxle,  
taasoo barke bu yaa.

<sup>26</sup> Ki lay wax dëgg  
sa soppe la.

<sup>27</sup> Ruujal sab tool, ji ko,  
doora tabax sa kër.

<sup>28</sup> Bul tuumaal nit ci neen,  
te bu ko seedeel ay fen.

<sup>29</sup> Bul ne: «Li mu ma def laa koy def,  
damay feyu li mu ma def.»

*Yaafus amul njariñ*

<sup>30</sup> Toolub ku yaafus laa jaare,  
ak tóokérub nit ku ñàkk bopp.

<sup>31</sup> Ndeke lépp a nga saxi dég,  
fépp fees akum ñax,  
tabaxu doj ba ko wér màbb.

<sup>32</sup> Maa ko gis, di xalaat,  
xoolaat ko, jànge ca.

<sup>33</sup> Booy dajjant ak a for bët,  
di tegley loxook a jaaxaan,

<sup>34</sup> néewlee ngi lay dikkal nib sàcc,  
ñàkk gànnaayul la.

## **Yeneen kàddu yu xeloo ngi yu tukkee ci Suleymaan**

### **25**

*(Saar 25—29)*

<sup>1</sup> Lii it ay kàddu yu xelu la, di yu Suleymaan,  
ay niti Esekiya buurub Yuda sotti ko.

<sup>2</sup> Màggug Yàllaa ngi ci li mu làq,  
darajay buur a ngi ci li mu feeñal.

<sup>3</sup> Maneesula daj li ci xelu buur,  
xalaatam daa kawe ni asamaan, xóot ni suuf.

<sup>4</sup> Xellil xaalis, tonni lu ca rax,  
ba ab tègg man caa am ndab.

<sup>5</sup> Ab soxor it, dàqal, mu sore buur,  
ngir njubte law, jalām sax.

<sup>6</sup> Bul réy-réylu fi kanam buur,  
 bul tooge jataayu boroom daraja,  
<sup>7</sup> ndax ñu ne la: «Yéegal, jegesi fii,»  
 moo gën ñu torxal la ci kanam kilifa.

Boo gisalee sa bopp it,  
<sup>8</sup> bul gaawa layooji,  
 ana nooy def ëllëg, bu ñu la yeyee?  
<sup>9</sup> Ñaarool ak ki nga joteel,  
 te bul jéebaane jaambur.  
<sup>10</sup> Lu ko moy ñu dégg ko, rusloo la,  
 sab der yàqu yaxeet.

<sup>11</sup> Wax ju ñor di nataalu wurus  
 wu tege ci xaalis.  
<sup>12</sup> Kàddu yu lay yedd ci kuy dégg,  
 jaarob wurus la mbaa gànjaru ngalam.  
<sup>13</sup> Ndaw lu wóor day seral xolu njaatigeem,  
 mooy ndox mu sedd ci tàngooru ngóob.

<sup>14</sup> Kuy dige te doo joxe,  
 yaay xiin wu ngelaw, mu naaxsaay.

<sup>15</sup> Muñ mer ay nax kilifa,  
 te wax ju neex, fu mu jaar, mu nooy.

<sup>16</sup> Boo gisee lem, lekkal lu yem;  
 bu éppee, nga waccu ko.

<sup>17</sup> Na sa tànk di gëj kér dëkkandoo;  
 boo ko sàppee, mu jéppi la.

<sup>18</sup> Ku seedeel sa moroom ay fen,  
yen nga ko aw njur mbaa saamar mbaa fitt.

<sup>19</sup> Bul wóolu workat bésub njàqare,  
mooy bëñ bu bon mbaa tànk bu nasax.

<sup>20</sup> Kuy woy, boroom tiisu xol di dégg,  
yaa futti mbubbam cib sedd,  
mbaa nga jonj xorom ci góomam.

<sup>21</sup> Bu sab noon xiifee, jox ko mu lekk,  
bu maree, may ko mu naan,  
<sup>22</sup> day rus ba mel ni koo yeni xal,  
te Aji Sax jee lay fey.

<sup>23</sup> Jëw, mer a cay topp;  
mooy ngelawal taw, taw a cay topp.

<sup>24</sup> Dékkeb ruq cim sàq  
moo gën jabar ju pànk.

<sup>25</sup> Xibaaru jàmm, bawoo fu sore  
mooy ndox mu sedd ci ku loof.

<sup>26</sup> Ku jub bu dee nangul ku bon, yàqu na,  
ni seyaan bu nëx mbaa teen bu xàbb.

<sup>27</sup> Lekk lem ju ëpp baaxul,  
te wut waaw-góor du ngóora.

<sup>28</sup> Ku dul ànd ak sa sago,  
yaa neexa song ni dëkk bu dara wérul.

## 26

### *Ràññeel ab dof*

<sup>1</sup> Teraanga jekkul cib dof,  
mooy seddub nawet mbaa taw cim ngóob.

<sup>2</sup> Ñaan-yàlla, soo tooñul, du la dal,  
day mel ni picc muy naaw, tëë tonj.

<sup>3</sup> Xiir, aw fas; laab, mbaam;  
yetu gannaaw, ab dof.

<sup>4</sup> Bul topp ab dof cig ndofam,  
lu ko moy nga mel ni moom.

<sup>5</sup> Waaye toppal ab dof cig ndofam,  
lu ko moy mu defe ne daa muus.

<sup>6</sup> Ku yóbbante ab dof kàddu,  
yaa woo fitna, gor say tànk.

<sup>7</sup> Kàddu gu xelu ci gémmiñug dof,  
mooy tànki lafañ, amalu ko njariñ.

<sup>8</sup> Kuy teral ab dof,  
jël ngaw doj, takk ko ci mbaq.

<sup>9</sup> Kàddu gu xelu ci gémmiñug dof  
mooy car aki dégam, màndikat xàcci.

<sup>10</sup> Njaatige luy liggéeyloo ab dof ak kuy romb,  
daa mel ni fittkat buy gaañ ku ne.

<sup>11</sup> Dof day def jëfi dof, dellu ca,  
mooy xaj, bu waccoo, lekkaat ko.

<sup>12</sup> Ana koo gis mu ne: «Maa xelu»?  
Kooku ab dof a ko gën demin.

### *Ab yaafus a ngi*

<sup>13</sup> Ab yaafus da naan: «Gayndee ngi ci yoon wi!  
Gayndee ngi ci mbedd mil!»

<sup>14</sup> Ab yaafus day tèdd ak a walbatiku,  
mooy bunt, day jaayu, demul fenn.

**15** Ab yaafus day yeb loxoom ci ndab,  
waaye yékkati ko, sex, da koy sonal.

**16** Ab yaafus day foog ne moo gëna muus  
juróom ñaari boroom xel yu xam tont.

*Ay nit ñuy loree ngi*

**17** Kuy xuloo lu sa yoon newul,  
yaa jàpp ci noppì xaj buy romb.

**18-19** Nit kuy naxe,  
naan: «Damay fo!»  
yaay dof buy sànniy jum,  
di fitteek a reye.

**20** Bu matt amul, ab taal fey,  
fu soskat amul it, xuloo jeex fa.

**21** Kériñ defi xal, matt xamb ub taal,  
ab xulookat di xambu ay.

**22** Waxi jëwkat di ñam wu neex,  
wuy seey, jàll ca biir-a-biir.

**23** Kuy wax lu neex, tey mébét lu bon,  
yaay xaalis bu rax, ñu xoob ca ndabal xandeer.

**24** Ab noon làqoo na ay waxam,  
lal pexey wor ca xolam.

**25** Buy wax lu neex, bul gëm,  
ñaawtéef la xol ba fees dell.

**26** Su la nëbbalee mbañeeł, di la nax it,  
ag mbonam mujj bir ñépp.

**27** Ku gasal nit am yeer, yaa cay daanu;  
ku bérañu doj, ngir tance, yaay tancu.

**28** Kuy fen, dangaa bañ ka nga fenal,  
te boroom làmmiñ wu neex day sàanke.

# 27

*Yeneen diglee ngi*

<sup>1</sup> Bul damoo ëllëg,  
ndax xamoo luy xew tey.  
<sup>2</sup> Bul téggu, bàyyil ñu tagg la,  
muy waxi keneen; yaw, bu ko wax.

<sup>3</sup> Doj diis na, suuf dib sëf,  
waaye fitnay dof a ko raw.

<sup>4</sup> Xadar day ñàng, mer di wal mu baawaan,  
waaye fiiraange amul moroom.

<sup>5</sup> Artu yu ñu la biralal  
moo gën cofeel gu la boroom ñooru.  
<sup>6</sup> Soppe, bu lay gaañ sax, wóolu ko.  
Nit bañ na la, te di la fóon lu bare.

<sup>7</sup> Ku suur, bañ lem ju xelli,  
waaye boo xiifee, lu wex lu ne neex la.

<sup>8</sup> Ku sore fa nga bokk,  
dangay mel ni picc mu sore tàggam.

<sup>9</sup> Diwook suuru day naatal xol;  
waaye li neex cib xarit, xol la lay digale.

<sup>10</sup> Bul fàttele sab xarit mbaa sa xaritu baay,  
bul jàq ba seeti sa mbokk;  
dëkkandoo bu jegee gën mbokk mu sore.

<sup>11</sup> Muusal, doom, ma bégi,

ba mana tontu ku ma sikk.

**12** Kuy foog, gisu ay, làqu;  
ab téxét ne ca tëñëx, loru.

**13** Ku gàddul jaambur bor, jëlal mbubbam;  
tayle ko, moo dige fey়al ndaw su yemadi.

**14** Nuyoo bu xumb, suba teel  
mooki saagaa yem.

**15** Jabar ju pànk  
mooy senn bu dakkul, cib taw;

**16** ku ko mana yemale,  
mana téye ngelaw mbaa nga ñëb ag diw.

**17** Weñ ay nàmm weñ,  
nit ay nàmm xelu moroom ma.

**18** Ku aar garab, lekk ca doom ya;  
ku topptoo sa sang, am ngërëm.

**19** Ku xool cim ndox, gis sa kanam,  
nga xool sab xol, gis sa jikko.

**20** Njaniiw ak biir suuf du fees,  
bët it du doylu mukk.

**21** Xaalis ak wurus sawaraa koy xelli,  
waaye àtteb nit ca jëëm.

**22** Soo jëloon ub dof, yeb ci gënn,  
booleek pepp, wol,

du tax ndof ga deñ.

<sup>23</sup> Xamal bu baax lu say gàtt nekke,  
te def sa xel ci say gétt,

<sup>24</sup> ndax alal wéyul fàww,  
ag pal du ñeel sëtoo sët.

<sup>25</sup> Gannaaw bu ñu gubee,  
ba ñax saxaat,

ñu dajale ngooñ ma ca tund ya\*,

<sup>26</sup> say xar da lay amal koddaay,  
bëy yi génneel la njégu tool.

<sup>27</sup> Meewum bëy daldi am, ba doy la dund,  
yaak sa waa kér  
ak sa surga yu jigéen.

## 28

<sup>1</sup> Ku bon daw na te dàqeesu ko,  
ku jub ñeme ni gaynde.

<sup>2</sup> Bu am réew dee fippu, kilifa ya bare;  
réew mu jàmm sax, kilifa gaa am déggin ak xam-xam.

<sup>3</sup> Ku ñàkk, su jekkoo ab ndóol,  
du ko bàyyil fepp, day mel ni waame.

<sup>4</sup> Ku wacc yoon, gérëm ku bon;  
ku wormaal yoon, jàñkoontæk ku bon.

<sup>5</sup> Ku bon xamul njub,

\* <sup>27:25</sup> 27.25 Ca Israyil tund yaa èpp lu muy taw, te fa la ñax ma èppe.

kuy wut Aji Sax ji, xam nga njub bu wér.

<sup>6</sup> Ñàkk te mat  
moo gën barele te dëng.

<sup>7</sup> Gone gu sàmm yoon am nag dégg,  
ku ànd ak sagaru nit gàcceel sa baay.

<sup>8</sup> Kiy leble di tege, ba barele,  
kay yéwéne néew-ji-doole lay dencal.

<sup>9</sup> Soo dee tanqamlu yoon,  
sag ñaan sax Yàlla suur na ko.

<sup>10</sup> Ku yóbbe bákkaar nit kuy jubal,  
yeer ma nga gas, yaa cay tàbbi,  
waaye ku mat di jagoo ngëneel.

<sup>11</sup> Waay a ngi barele, defe ne xelu na;  
ku néewle am ug dégg, gis ne xeluwl.

<sup>12</sup> Bu ku jub amee ndam, mbégte mu réy la;  
ab soxor falu, ñépp làquji.

<sup>13</sup> Kuy làq say tooñ doo baaxle,  
ku koy nangu, tuub ko, am yërmandey Yàlla.

<sup>14</sup> Mbégte ñeel na ku saxoo ragal,  
waaye ku dëgér bopp tàbbi ci njekkar.

<sup>15</sup> Kilifa guy soxore néew-ji-doole  
mook gaynde guy yëmmoo yem, mbaa rab wuy  
songe.

<sup>16</sup> Kilifa gu amul ug dégg, day foqati rekk,  
waaye ku bañ lu lewul, gudd fan.

<sup>17</sup> Ku bóom nit, daw, ba tàbbi njaniiw;  
bu ko kenn taxawu.

<sup>18</sup> Mat, mucc;  
dëng, dàll daanu.

<sup>19</sup> Beyal sab tool, sab dund doy;  
topp ay caaxaan, ndóol ba doyal.

<sup>20</sup> Boroom worma, bare barke;  
ku yàkkamtee woomle, sa mbugal du jaas.

<sup>21</sup> Par-parloo baaxul,  
waaye dogu mburu moyloo na kilifa.

<sup>22</sup> Ab nay day yàkkamtee barele,  
te xamul, ba ko ñàkk di dab.

<sup>23</sup> Boo artoo nit, mu baaxe la ëllëg;  
yaa koy gënal ku ko doon jay.

<sup>24</sup> Ku xañ say waajur seen alal  
te defe ne tooñoo,  
yaa neexook saaysaayu yàqkat.

<sup>25</sup> Ku bëgge day sooke ay,  
te ku wóolu Aji Sax ji, woomle.

<sup>26</sup> Ku doyloo sam xel, dof nga;  
ku jëfe xel mu rafet, mucc nga.

<sup>27</sup> Kuy jox néew-ji-doole, doo ñàkk;  
nga gëmm ne gisoo, bare ku la móolu.

<sup>28</sup> Bu ab soxor faloo, ñépp làquji,  
bu daanoo, ku jub teg tànk.

## 29

<sup>1</sup> Ku ñuy àrtu, nga të ticc,  
dangay jekki yàqu, ba wees am paj.

<sup>2</sup> Ku jub falu, baadoolo bég;  
ab soxor jiite, baadoolo binni.

<sup>3</sup> Kuy jëfe xel, bégal sa baay;  
nga ànd aki gàncc, yàq alal.

<sup>4</sup> Buur jub, am réew dëgér;  
mu bëggi galag, réew ma sàngku.

<sup>5</sup> Kuy jay sa moroom,  
yaa ngi koy dugal.

<sup>6</sup> Ku bon day moy, ba dugal boppam;  
ku jub di woy ak a bànnexu.

<sup>7</sup> Ku jub a xam àqu néew-ji-doole,  
ab soxor xamu ca dara.

<sup>8</sup> Ñaawlekat a ngi taal ab dëkk,  
ku xelu di giifal mer.

<sup>9</sup> Boroom xel, buy layook ub dof,

bu mereek buy ree, jàmm du am.

**10** Ab bóomkat day sib ku mat,  
di wuta bóom kuy jubal.

**11** Ab dof day mer, sàmbaar;  
ku xelu, mer, ànd ak sagoom.

**12** Kilifa dégluy fen,  
jawriñ yépp di ñu bon.

**13** Ku ñàkk ak ka ko nennoo bokk lenn,  
Aji Sax jee leen boole sàkk.

**14** Buur àtte way-ñàkk ci dëgg,  
ab jalam sax.

**15** Deel bantal ak a yedde, day rafetal xel;  
gone goo bay-bayal, mu gàcceel ndeyam.

**16** Bu ku bon féetee kaw, ag moy law,  
waaye ku jub, fekke jéllu ku bon.

**17** Yaral sa doom, mu noppal la,  
bànnexal la.

**18** Fu Yàlla feeñooowul, nit ña fétteeral,  
waaye ku topp yoon, am mbégté.

**19** Waxi neen yarul surga,  
da lay dégg te du la déggal.

**20** Ana koo gis, mu rattaxle?

Kooku ab dof a ko gën demin.

<sup>21</sup> Ku yàq sab surga ba muy ndaw,  
bu ëllëgee mu defe ne doom la\*.

<sup>22</sup> Boroom xadar day sooke ay,  
te ku tàng bopp moy, moyati.

<sup>23</sup> Réy-réylu, detteelu rekk;  
woyofal, ñu naw la.

<sup>24</sup> Ku ànd akub sàcc, sa noonu bopp nga:  
soo waxee dëgg, yoon topp la;  
soo ko miimee, Yàlla topp la†.

<sup>25</sup> Ragal nit dugal sa bopp la,  
ku wóolu Aji Sax ji, fegu.

<sup>26</sup> Ñu baree ngi sàkku kilifa baaxe leen,  
moona Aji Sax jeey àtteb jaam.

<sup>27</sup> Ku jub day sib ku dëng,  
ku bon sib kuy jubal.

## Kàddu yi Agur wax

### 30

(Saar 30)

\* <sup>29:21</sup> 29.21 Mbaa: bu ëllëgee mu jaaxal la. † <sup>29:24</sup> 29.24 Yàlla topp la: seetal ci Sarxalkat yi 5.1: Bu nit bàkkaaree ndax lu mu dégg wooteb seede cib àtte, ba noppì baña wax la mu gis mbaa mu xam ko ca mbir ma, dees na ko ko topp.

<sup>1</sup> Lii waxi Agur la, góor gay doomu Yake mu Maasa\*. Góor ga daa wax ak Itiyel, wax ak Itiyel ak Ukal. Mu ne:

<sup>2</sup> Maa dofe dëgg, ba yées ci nit ñi,  
dég-dégu nit sax awma ko.

<sup>3</sup> Jànguma, ba am xel mu rafet,  
awma xam-xam ci Aji Sell ji.

<sup>4</sup> Ana ku yéegoon asamaan, ba wàcc?  
Mbaa mu masa njëb ngelaw ciy loxoom?  
Ana ku masa ëmb ndox ci ndimo?  
Mbaa mu rédd mboolem kemi àddina?  
Nu mu tudd ak nu doomam tudd?  
Wax ma, yaw mi ko xam!

<sup>5</sup> Lu Yàlla wax, mat na sëkk,  
mooy yiir ku ko làqoo.

<sup>6</sup> Bul yokk ay waxam,  
mu weddi say fen, nga weeru.

<sup>7</sup> Éy Yàlla, yaar laa la ñaan,  
ngalla may ma ko sama giiru dund:

<sup>8</sup> caaxaan aki fen, yal na ma sore,  
néewleek barele, bu ma ci may lenn,  
leel ma lu ma doy;

<sup>9</sup> lu ko moy ma regg, weddi la,  
ba naan: «Kuy Aji Sax ji?»

Mbaa ma ñàkk bay sàcc,  
di la ñàkke worma, yaw sama Yàlla.

---

\* **30:1** 30.1 Maasa bérab la bu genn giirug Israyil sancoon ca bëj-gànnaru Arabi.

**10** Bul sikkal ab surga ca njaatigeem,  
da lay ñaan-yàlla, mu dal la.

**11** Ag maas a ngi saaga baay,  
te wormaaluñu ndey.

**12** Ag maas a ngi defe ne set nañu,  
te taq ripp ak bákkaar.

**13** Ag maas a ngi danjjiiral;  
aka ñoo mana xeeloo!

**14** Ag maas a ngi, seeni sell niy saamar,  
seeni gëñ niy paaka,  
ñuy lekk néew-ji-doole, ba raafal leen ci réew  
mi,  
ba ku ñàkk jeex ci biir nit ñi.

*Ay kàddoo ngi yu ànd ak lim*

**15** Saxu watar du suur, ñaar ñu jigéen la am:  
Jox Ma ak Jox Ma.

Ñett a ngii ñu dul suur,  
ba ci ñeent ñu dul ne doy na mukk:  
**16** njaniiw,  
jigéen ju jaasir,  
suuf, du màndi ndox,  
sawara, du ne doy na mukk.

**17** Kuy xeelu sa baay,  
di siidee déggal sa ndey,  
baaxoñ génne ciw xur, luqi sa bët,  
tan ya lekk.

**18** Ñett a ngii, yéem na ma,  
ba ci ñeent yu ma xamul:

**19** yoonu jaxaay ci asamaan,

yoonu jaan ci kawi doj,  
 yoonu gaal ci diggu géej,  
 yoon wi góor di jaar as ndaw.

<sup>20</sup> Jikkoy jigéenu moykat a ngi.  
 Day lekk, wommiku, te naan:  
 «Defuma dara lu aay!»

<sup>21</sup> Ñett a ngii, day yëngal suuf,  
 ba ci ñeent yu suuf àttanul:  
<sup>22</sup> jaam bu falu buur,  
 dof bu regg,  
<sup>23</sup> ndaw su bon su for jëkkér,  
 jigéen ju wuutu sangam bu jigéen.

<sup>24</sup> Ñeent a ngii, di lu tuut ci kaw suuf,  
 te am xel, yaroo xel:  
<sup>25</sup> xorondom, néew na doole,  
 waaye bu jotee, mu denc dundam;  
<sup>26</sup> daman†, barewul kàttan,  
 te day dëkk ciy doj;  
<sup>27</sup> soccet, amul buur,  
 teewul ñuy àndandoo, diy gàngoor;  
<sup>28</sup> sindax, manees na koo ñëb,  
 teewul ma nga biir kér buur.

<sup>29</sup> Ñett a ngii, ñu jekk um ndaag,  
 ba ci ñeent ñu jekk doxin:  
<sup>30</sup> gaynde, mooy buuru rab yi,  
 ragalul kenn;  
<sup>31</sup> séq daagu, jekk taxawaay,

---

† **30:26** 30.26 Daman xaw na nirook njomboor.

ab sikket,  
ak buur ci biiri dagam.

<sup>32</sup> Boo sàgganee bay tèggu,  
mbaa ngay mèbét lu bon,  
nanga téye saw làmmiñ.

<sup>33</sup> Ndax ku ruux soow, am ca dax,  
ku wañaar bakkan, mu nàcc,  
te lu jógal xol, indiw ay.

## Buur Lemuyel a ngi yeete

### 31

(Saar 31)

<sup>1</sup> Lii waxi Lemuyel la, buuru Maasa\*, te  
ndeyam jängal ko ko. Mu ne:

<sup>2</sup> Ngóor si doom, saa doomi bopp!  
Yaa di ñaan gu nangu, doom!

<sup>3</sup> Bul jox jigéen ñi sa doole,  
bul jox say siddit jigéen ñiy sànk buur.

<sup>4</sup> Buur moomul di naan biiñ, Lemuyel,  
buur moomu ko;  
kilifa moomul di sàkku ñoll.

<sup>5</sup> Lu ko moy mu naan, ba fàtte lu yoon tèral,  
xañ néew-ji-doole ju ne, àqam.

<sup>6</sup> Bàyyeel ñoll kuy sànkú,  
bàyyi biiñ ak boroom naqar.

<sup>7</sup> Bu ñu naanee, fàtte seen néewle,  
ba dootuñu fàttliku seenu tiis.

<sup>8</sup> Nanga àddul ku amul kàddu,

---

\* **31:1** 31.1 Maasa bérab la bu genn giirug Israyil sancoon ca  
bëj-gànnaru Arabi.

ku sësul fenn, nga ñonjal àqam.

<sup>9</sup> Deel àddu, di àtte njub;  
ku ñàkk ak ku néewle, nga sàmm àqam.

*Jeeg bu baax nii lay mel*

<sup>10</sup> Jeeg bu jàmbaare, ndaw lu jafe,  
ba rawati gànjar!

<sup>11</sup> Jékkér ja da koy wóolu,

te jékkér ja day am xéewal, du ko ñàkk.

<sup>12</sup> Day defal jékkéram lu baax, du ko lor,  
tey ànd ak bakkan.

<sup>13</sup> Day wut kawari gàtt aki wëñ,  
di ca liggéeye mbégte.

<sup>14</sup> Day mel ni gaalu jula,  
di jéli dundam fu sore.

<sup>15</sup> Day jóg te bët setul,  
di waajal njëlu njabootam,  
ak a sas ay janqam.

<sup>16</sup> Day seetlu ab tool, jënd ko,  
sàkk ciw ñaqam, jémbat tóokér.

<sup>17</sup> Day gañu di góor-góorlu,  
ak a dëgëral përéng ya.

<sup>18</sup> Day gis njartel liggéeyam,  
te làmpam du fey guddi.

<sup>19</sup> Ma ngay yor poqe  
ak këccu, di ècc.

<sup>20</sup> Day jox ku ñàkk,  
di sàkkal néew-ji-doole.

<sup>21</sup> Tiitul ci njaboot gi sedd bu metti,  
ndax ñoom ñépp ay tegley yére.

<sup>22</sup> Mooy sàkkal boppam ay malaan,  
ay yéreem mucc ayib te yànj.

<sup>23</sup> Dees na ràññee jékkéram ca pénc ma,

fa muy toog ca magi réew ma.

<sup>24</sup> Ndaw su ni mel day ràbb ay yére, di jaay,  
aki gañaay, di jox jaaykat yi.

<sup>25</sup> Faaydaak jom la làmboo,  
te ëllëg ubul boppam.

<sup>26</sup> Day wax lu xelu,  
di digle ngor.

<sup>27</sup> Jigéen jooju mooy bàyyi xel ci njabootam,  
te du nangoo yàccaaral.

<sup>28</sup> Doom ya dañu ko naan: «Jarawlakk!»  
jëkkér ja di ko gérëm naan:

<sup>29</sup> «Jeeg bu jàmbaare bare na,  
waaye yaw, yaa ci raw.»

<sup>30</sup> Melokaan wu jekk day naxe, taar day wéy,  
waaye jigéen ju ragal Aji Sax ji,  
kookoo jara gérëm.

<sup>31</sup> Joxleen ko njukkalu ñaqam,  
jëfam di woyam ca pénc ma.

**Kàddug Yàlla gi  
Wolof Bible 2020 revision.  
La bible en wolof, revision 2020**

copyright © 2010, 2020 La Mission Baptiste du Sénégal

Language: Wolof

Dialect: Regional Wolof

Translation by: La MBS

For complete copyright statement, please see <http://sng.al/copyright>

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-07-22

---

PDF generated using Haiola and XeLaTeX on 11 Nov 2022 from source files dated 23 Jul 2020  
eb088fb7-76e3-5c5f-ab35-a0da6cd8fd40